


# AA MEEMA-ATANWAKO KIMYE

## KYONSE KUFUMA KU JIBWE

 Twasata bingi lukeelo luno pa Kyeenyi kya Nkambo Lesa, akyo kyakonsha kutatula kupwila kwa bukiji bukiji pa kwitupa mbila, kyakuuba mba—mba twafwainwa “kuteleka, kwikala na munema” ku meso Aji, amba Uji na kintu kimo kya kwamba kwi atweba. Amiwa naketekela mba Aye ukekyuba kyo Alaile. Aye kimye kyonse ulama Kyambo Kyanji. Kabiji nanchi twasata bingi pa kutanwa pamo, na bumi, kabiji kuno ku lubaji lwa Peenape lukeelo luno, kabiji ne kukonsha kupopwela Nkambo ne jikwabo, kabiji ne kutanwa atweba bene pamo kabiji ne kumvwa kwi Aye. Ao oene mambo otwishila pamo, ke namambo a kyonkakye.

<sup>2</sup> Pano, Amiwa najikuya ku Mulongo Neville, kwakubula ne kuketekela ne, leelo, mambo a kiloto kimo kyo Najinga nakyo. Kuuba mba...Naketekela mu...Ami...mu biloto. Naketekela mba Lesa wingila na bantu na biloto. Kabiji Najinga na kiloto kyapusanako, keeshaja bufuku. Amba, Nailenga mwaya katumbatumba, katumbatumba kamo, nayilenga ku kifulo kya kujilako ako ko Nafwaijilwe kwi—kwikala na kajo kamulajilo. Kabiji Namwene mba, byo Nafikile kwipi na kifulo, baimbelenga nyimbo, jibumba ja banyimbi jaimbilenga nyimbo, na mitolilo, kabiji basangajikilenga bantu mu kimye kyo bajilenga. Kabiji pajingapo kintu kimo kyo Nabujile kutemwa, nanchi Napitajilepo popa pantu. Kabiji Amiwa nakumenye muntu umo kasa abena kukajila katumbatumba. Kabiji Nantajile, kabiji bantu bavula batutukilenga katumbatumba kuya ku kifulo kya majila. Bino kyamwekele nobe Nebapitaila abo, nabwelele kwalulukila ku kilujo, nangwa, ku lubaji lwa kipiko.

<sup>3</sup> Kabiji mu musango umo, monkamwa mu kipachiko, Namwene tabbanako. Naumvwine jiwi ja muntu umo, jaambile mba, “Kumanyai Mulongo Branham pa kilang’enyoy ya kananga-ne-kananga. Aye ubena kwikila katumbatumba peulu popa. Kabiji mu kamubule kikananga-ne-kikananga.” Kabiji Naendele lubilo kufika pa ku kilang’enya.

<sup>4</sup> Kabiji muntu byo aishile, wajinga Mulongo Neville wamvwala suti wanji wachiluluka, wamweketu nobe byo aikala popa lukeelo luno. Kabiji aye waambile mba, “Mulongo Branham, inge usakwikala mu muzhi,” waambile mba, “kyakonsha kwikala ke—kintu kyawama obewa kwikila mushi, mambo Mulongo Hank...” Bino, yekatu umo ye Nayuka,

Mulongo Hank, ke Mulongo Henry Carlson, tumutela mba Hank. Waambile mba, “Aye wakonsha kulangaluka mba ke kintu kyenyezi pakubula kupepula tabbanako javula inge obewa uji mu tauni, nangwa mukachi ka muzhi pa moba acheche.” Nabukile patulo.

<sup>5</sup> Kabiji, pa kyokyo, Naumvwine nobe kintu kyenyezi. Amiwa kechi nakebelenga kusolomoka pa kyokya kimye kya mulungu ne, poso Naipwizhe Mulongo Neville inge wajingapo na kintu kimo kyapusanako lukeelo luno, kya kipwilo. Nanchi aye wajinga na lusa, nobe kimye kyonse, waambile mba, “Iya kuno.” Nanchi, popotwafikatu. Namwichile keesha kimye kyapwa mabaanga, kabiji naiya lukeelo luno, mwi atweba kafwako nangwa umo waketekejile ne.

<sup>6</sup> Bino Naketekela mba kyakonsha kwikala kintu kyawama, patanshi, kwi amiwa kiji nobe kya—kya kwimulondolwelapo bintu bimo. Amiwa, nafwainwa, kwikala muntu wapusanako bingi ku bantu bavula. Kabiji ne kwi Amiwa mwine nji wapusanako, ne apo. Mambo, Amiwa ngeseka kulondela lutangijilo lwa Mupashi Wazhila, pepi nobe byo Nakonsha kuuba. Kabiji akya kitulenga kwikala bapusanako, mwamona. Atweba tuuba bimo bintu byo—byo twikalala panshi kabiji twakumya bimye bimo, “Kika kyo Naubila kyokya kintu? Pano Nakonsha kuuba byepi kintu kiji byobya?” Kabiji ponkapotu waumvwa nobe wauba kintu kyo wafwainwa kubula kuuba. Bino inge wakonsha kwikalatu watekanya, ne kwikala na lwitabilo, kabiji waketekela mba Lesa wakutangijila kwikyuba, mwakonsha kutana mba kingilatu bulongo. Mwamona? Kabiji bimye byavula tutana kyokyo. Kabiji Nayuka Mulongo Neville watana kyokyo, bimye byavula. Kabiji batangi ne bantu ba bumupashi bavuluka kyokyo.

<sup>7</sup> Papita kimye mu bumi bwami kuuba mba... Kwamba patoka, kufuma po Najingatu mwanyike nsongwalume, Amiwa kechi na kyumvwapo mba Nakonsha kwikala mu—mu Jeffersonville ne. Kimye kyonse kyaikala nobe kwikala mu manyi, pakuuba mba ngikale kuno. Kintu kitanshi, lubesha wakana kuswang’ana pamo ne amiwa. Kintu kikwabo, kimweka nobe kubwela panshi kwa mupashi.

<sup>8</sup> Inge wabwela lunyuma ne kutala kuntu kumo kukwe, inge kechi kya onawinwe ne mu kimye kya muyulo, kuji kalata ya pa kyokyo, yo Najinga nayo, byo naichilwe patanshi mu mwingilo, Natatwile kuya. Kabiji Mulongo George DeArk ne Ami... .

<sup>9</sup> Kabiji ne bainanji Mulongo Graham Snelling, Mulongo Hawkins uji na busulu bwa kiteshenyi kya manyi ku New Albany, kabiji ne bantu bavula, bakumenye pangye ya mbung’eno icheche ya milombelo kokwa. Kabiji ne kwamba mba, inge Nakonsha kwikala, bakonsha kuswisha baana babo ku tebulu, mu—mu kushimika tabbanako, kyakuuba mba kechi

bakonsha kusendwa kufuma pa kifulo kimo ne kuya pakwabo ne.

<sup>10</sup> Byo Naumvwine awa bamaama wamucheche, na mwaana umo ye akwata ku kuboko kwanji kabiji ne mukwabo mu maboko anji, ne kwamba mba wakonsha kuswisha baana banji kutanwa ku tebulu, pakuuba mba bakonsha kushimika kifulo po bafwainwa kwikala ne kupopwela, kyajinga kyakosela bingi pakuuba mba ngimane. Nanchi Mulongo George ne Amiwa twaikele pamo ne kufukula kushimika tabbanako.

<sup>11</sup> Kabiji tabbanako byo ashimikilwe, kimye kyonse kyamwekanga...Alwa lukeelo lo Napesheshe tabbanako, kimonwa kyaishile, akyo kyanembwa pa jibwe ja jikoka popa, kimye Mupashi Wazhila kyo aambile kwi amiwa mba, “Aye kechi tabbanako yobe ne.” Mwamona? Kabiji Naipwizhe tabbanako wami ko ajinga, kabiji Aye wangikajikile mushi ya jiulu jatoka ja kifufya. Kabiji pano Aye waambile mba, “Ingila mwingilo wabusapwishi,” ne bikwabotu, nobe byo mwayuka. Kyanembwa ne mu mabuuku.

<sup>12</sup> Byonse bye bintu kubikwa pamo. Kabiji juba jimo byo Nakupilenga nsono kokwa ako Mulongo Wood ko ekala pa kino kimye, kabiji bako-bami-babakazhi baikalanga konkakwa pa kyokya kimye; Naikajile pa tampulo ya kunyuma, tampulo icheche ya shamende wakala, apo po Nashimikile kikye kifulo kicheche kya ba bako-bami-babakazhi. Kabiji abo bajinga bakulama koloko pa kyokya kimye, ne kwiisopa. Kabiji kijitu pamo nobe muntu wakonsha kwamba, Jiwi jaambile kwi amiwa, amba, “Amiwa kechi nakonsha ku kupesha ne inge waikala kuno. Obewa wafwainwa kwiabanya obewa mwine ku bantu bobo kabiji ne kino kifulo.” Kyawama, Amiwa, akya kyatabawiletu mu bipimvwa, pepi nobe mulungu umo nangwa kukilapo.

<sup>13</sup> Kutwajijilatu, kimye kyonse, Kintu kimo kyajimwine, “Fumapo yanga, fumapo yanga. Yanga ja muzhika. Twajijilatu na kuya ku muzhika.” Kyawama, Ami...Kimye kyonse kikatazha. Kabiji kyamweka nobe kimye kyonse... .

<sup>14</sup> Bino, Nekimwesheshe patoka mu milanguluko yami amba uno mulungu Amiwa nkaya nandeke ku Tucson, ako ko Nafwainwa kulupilanga mpuzha, kwikala kokwa mu kimye kya mashika; ne kubika baana mu sukuulu, kutatula mu Kainyainya. Najinga na mpuzha. Kwajinga ne mpuzha yapainwe kwi amiwa kokwa. Bino kujipo kintu kimo kya... .Kabiji—kabiji inge Naya... .

<sup>15</sup> Kintu kikwabo kyo Nakonsha kutemwa kwamba. Kasa tukyangye kushimika iye nzubo kokwa, nzubo ya kipwilo, apa po iji kino kimye, Amiwa kechi nakebelenga kwi ishimikila popa ne. Ba inabo bakazhi bami bajinga bakote. Kabiji abo bajijile ne mipolo pa kikye, aye waambile mba, “Amiwa kechi

nakonsha kusha ba maama kuno ne, na mambo a kuyuka mba bakota, kabiji kechi kuji wakonsha kwibalama ne.” Kyawama, Naumvwine kyokyo. Naumvwa. Aba ke bainanji, kabiji boboka bamaama bo ajinga nabo, nangwa bo akekala nabo. Nanchi, Naumvwine kyokyo. Nanchi Na—Nalombe kwi Nkambo, Naambile mba, “Nkambo, byokiji mba kechi Nekitemwa kifulo ne,” Naambile mba, “ndengai ngikale wikyumvwa buwame. Amiwa nkaya kuji konse Anweba ko mukakeba mba ngye, kufuma kuji konse. Bino kechi Nasaka kufichisha mukazhi wami pa muchima ne, pakuuba mba na mufumye kuno, kuya mu kyaalo kya bwenyi ako ko abula kuyukapo nangwa umo ne. Kabiji pano Amiwa bimye byonse ng’endauka, nangwa byonkabyo. Anweba ndengai kwikala wikyumvwa buwame pakuuba mba naikala nanji kuno.”

<sup>16</sup> Kabiji pano, bainanji byo batwajilwe, pano baya mu Lukumo, pano lutundaiko lwabwela jibiji, monai, pano lwa kwenda. Amiwa kechi nayuka byakuuba ne.

<sup>17</sup> Kabiji pano juba jikwabo alwe lufunjisho balongo po belutatwile kuno, Naimene ku pulupiti kimye kyapeleleko kyo Najinga kuno ne mubujile mba Amiwa kechi kekala mu mwingilo ne akya inge kyatwajijila kubiwa. Nanchi, balongo mu butemwe be kyolwele bulongo kyonse. Kyonse kyatokatu. Mukachi ka ma awala tweti-foolo, kypawile kyonse.

<sup>18</sup> Pano akya kyashikula jishinda jibiji kwi amiwa. Amiwa kechi nayuka kyakuuba ne. Amiwa kechi nayuka jishinda ja kuyamo ne. Amiwa naipuzha Nkambo amba apepo kimwesho. Amiwa namwipuzha Aye kumbuula byakuba. Bino Aye wandekatu naikala.

<sup>19</sup> Bino, bufuku bwapita byo Nafumishemo bonse banyike, bakazhi bami ne bonse, kufuma mu nzubo, Nepaine kwi Nkambo Lesa. Kabiji Naambile kwi Nkambo Lesa, “Inge Anweba mwakonsha nkupesha mujishinda jo Mbena kuyamo, Amiwa kemwingijila Anweba. Bino Anweba mwafwainwa nkumweshwa kwepi kwakuya, ne jishinda ja kuyilamo, kabiji ne kyafwainwa kubiwa.” Nanchi, Amiwa nepaine amiwa mwine kwi Nkambo. Na—na mwingilo ne byonse, Nebipaine kwi Nkambo. Kabiji Naambile mba, “Konse Anweba ko mukashikula, kiji kyonse Anweba kyo mukooba, Amiwa nkenda mujoja jishinda. Poso Anweba mwalenga jishinda, Amiwa nkatwajijilatu byonka Byonji poso Anweba mwalenga jishinda.” Kabiji Namwipwizhe Aye amba ekilete patoka bulongo kyakuuba mba kechi Nakonsha kujimbaikwa ne, mambo Naketekela kine mba tuji pa masanga a kintu kimo kumweka.

<sup>20</sup> Amiwa na wikyumvwa kwaulwa lukeelo luno kwi Mulongo Neville, nangwa wajikwikipana apo po Nayukile mba kyajinga na—kyajinga bungauzhi abo bo atongwelengako. Pano, onkao mambo, Nalombelela anweba bonse, kabiji Nakeba mba anweba

bonse mundombebele, pakuuba mba Mupashi Wazhila atangijile kuya konka ko Nafwainwa kuya, kyo Nafwainwa kuuba, pakuuba mba Amiwa nabula kuuba kilubo.

<sup>21</sup> Mwamona, bimye byavula, bantu balanguluka mba kya bupe kya bungauzhi, amba Lesa waambatu mba “Amiwa nsakukutola *papo*, ne kukubika *papo*. Pano obewa yangatu kulutwe *kukwe*.” Kabiji Aye kechi ukubuula byonse byo bintu ne. Inge Aye wikyuba, pano nga lwitabilo lwa kushinda lo lwepi? Mwamona? Monai, obewa, Aye ukuleka kwimana bunke boobe kukila ne pa muntu uji yense. Mwamona? Anweba bonse mwakonsha kwiya kwi amiwa na kwipuzha bintu bimo, kabiji Aye kechi wakikakalwapo ne kanatu Aye wimupa mukumbu. Abyo ibyo. Ee. Bino Nakonsha kumwimpuzha Aye pa bintu byami amiwa mwine, kabiji bimye byavula undekatu bunke bwami, monai, undekatu naya kulutwe na kwendamo bunke bwami.

<sup>22</sup> Amiwa njina bintu byo Nafwainwa kupwisha bunke bwami, kabiji ne byakufukula byo Nafwainwa kuuba. Kabiji akye ke kintu kyanema bingi, kyakuuba mba kechi Nakonsha kwi kyuba ne poso Naketekela mba kine Ye ubena kwamba kwi amiwa. Kabiji Ami—Ami. . . Aye kechi upa kimwesho ne. Aye undekatu bunke bwami. Nanchi Amiwa mbena kwikalatu nobe wakishale, nobe, lukeelo luno, Amiwa—Amiwa kechi nayuka jishinda jakuyamo ne. Nanchi, Amiwa nekipana kwi Nkambo.

<sup>23</sup> Na—Naumvwine ponkapo nobe, mbena kulota kyokyo mba, Nafwainwa kubwela kuno ku tabbanako na kukwasha Mulongo Neville poso kintu kimo kyamweka pakuya mu jishinda. Nanchi, Amiwa katwajijilatu.

<sup>24</sup> Amiwa najikwipuzha Mulongo Neville bimye bicheche byapitapo, “Kipwilo kana kibena kwenda byepi?”

Kabiji aye wajikwamba mba, “Kyawama.”

<sup>25</sup> Kabiji Naumvwa mba anweba mukiji na bya bupe bya mupashi ne bintutu bikwabo mukachi kenu, abyo bibena kwingila, bya bupe bya bungauzhi, kabiji—kabiji ne kwamba na jimi, ne kulumbulula jimi, nobe byo twajikumvwa bimye bicheche byapitapo. Kabiji abya bintu bikomesha kipwilo, kabiji pabaishatu.

<sup>26</sup> Bino Nalangulukile mba, kapepo bufuku buno Nakonsha, inge Mulongo Neville. . . Inge Mupashi Wazhila wabula kwitutangijila ku kintu kikwabo, bufuku buno Nafwainwa kutemwa kwikala na. . . Anweba bonse, kasa mukyangye kulupuka lukeelo luno, munembe jipuzho ne kwijitula papo, jipuzho jimo mu milanguluko yobe, pakuuba mba tuyuke kipwilo byo kibena kulanguluka. Ajo jo jishinda bakafunga jo baji najo ja kutainamo biji pa muchima wa bantu. Kabiji umo umo na jipuzho, jinembai ne kwijibika papo. Inge kechi muji na kipepala kya—kya kubikapo lukeelo luno, nanchi mwikinembe bufuku buno, bukiji bukiji. Nanchi, Nafwainwa

kutemwa kwikala na kimye Kyafwainwa, pa aao, ne kwi atalapo bulongo kabiji ne kwi akumbula mwaila Binembelo.

<sup>27</sup> Nanchi inge Nkambo waswa, inge kyaikala kyaswa muchima wa Lesa, Naji kwamba ng'ambilo kuno kechi papita bimye byavula ne, kyakuuba mba Nakonsha kwamba kwi anweba pa Tutetesho twapelako tutanu na tubiji twa . . . twa Lumwekesho. Pano inge atweba . . . Amiwa kechi nakonsha kupwisha tonse twa Tutetesho mu uno mwaka ne, mambo twafuma mu kyapitala kyabu 6 kya Lumwekesho, kupita mu—kupita mu kyapitala kyabu 19, pa kupita mu tonse Tutetesho. Pakuuba tutashi tusatu nangwa foolo twafwainwa kukumbula mu bufuku bumo, Nalanguluka mba, Katetesho kamo bufuku bumo.

<sup>28</sup> Pano, inge twakwatakanya, monai, po twapelejile mu Buuku wa Lumwekesho, apo Kipwilo po kyangwajilwe mu Lukumo, nanchi byashala ke kwingila na ba Yudeya, kechi na Kipwilo nangwa pachechetu ne. Kibena kwingila na kyaalo kya Buyudeya. Onkao mambo twafwainwa kubwela panyuma, kufuma pa Kushikulwa kwa Kipwilo, kabiji ne kutola . . . Twamona papo bikamweka mukimye kya Tutetesho, kabiji ne mu kimye kya Kipwilo kya Bangetila. Akyo Kipwilo byo kyaya; kabiji uji na kyaalo kya Isalela, kibwela lunyuma ne kuleta Isalela kufuma pa kimye kyoashajile, kufikatu ne pa kino kimye kyakatataka; kabiji ne kwiya Mesiyasa, ne kimye kyo bakatambula Mesiyasa.

<sup>29</sup> Pano mwikyumvwa nyi? Akyo Kipwilo kyashikulwa. Lesa patanshi waingijile na Kipwilo, Mankulo a Bipwilo. Twasendele kyokyo. Pano Kipwilo kyashikulwa kutwalwa mu Lukumo. Kabiji Mupashi Wazhila wabwela kunyuma na kusenda Isalela, nobe kyaalo. Kabiji ne kwikileta kufika ne pano, akwe Kijilo kya Masongola kasa kibena kubiwa, kabiji ne Kwibaleta jibiji kupelo ya kimye. Amiwa nkekala na bbulaki bodi wami, ne kwikilemba kabiji ne kwikifunjisha, kimye inge kyafika. Pano Nkambo wabwela na Musongwa, kabiji Isalela wamumona. Kabiji, oo, kikekala kimye kyawama bingi!

<sup>30</sup> Bino, kasa tukyanye kukwatakana na kikyene ne, kuji lufunjisho lwabaya alo lututwisha bafunda sukuulu wa mamboawama ne bavulatu, ne bafunjishi mwapita nkulo, ne bantu ba Kipwilo kya Kilishitu ne booba babena kwiya na kumvwa bibye, ko kuuba mba, Milungu Sebete yakwa Danyela. Tuji na . . . Atweba kechi twakonsha kuya kulutwe mu Lumwekesho ne poso twakashila pamo Musongwa ne Isalela na Milungu Makumi atanu na ibiji ya kwa Danyela. Kabiji kapepo, inge Lesa waswa, pakuuba mba Aye wafwainwa kwamba kwi amiwa mu kimye kya kulutwe, pa kwamba pa iye imo Milungu Sebete . . . nangwa, kechi Milungu Sebete ne, kana Tutetesho twapelako tutanu na tubiji. Nanchi Pamulungu walondelapo, Amiwa keseka kusenda Milungu Makumi atanu na ibiji ya kwa Danyela, Pamulungu ubena kwiya, inge Nkambo waswa.

Kabiji pano akyo kikashikula jishinda, inge Aye wakonsha kwitutangijila, kutatula pa akwabo. Kyawama, popo tukatuluka kufuma pa kyokya kimye.

<sup>31</sup> Mulongo Neville ne Amiwa tukengijila pamo pa kikye, kabiji ne kuuba kiji kyonse kyo twakonsha pakuuba mba tukwashe bantu.

<sup>32</sup> Pano, kubwela kunyuma kimye kyonse, tulombelela bakolwa, twikala bingi na lusekelo pa kuuba kyokyo. Kabiji Amiwa kape kekyuba pa kupwila konse, inge bantu bakolwa, ne kwibalombelela.

<sup>33</sup> Amiwa kechi nkabila kutwajijila bya kuyuka bapashi ne. Monai, pano kino kyo kyamwekele. Amiwa naeseka. Kabiji Nayuka mba Nauba bintu bingi; bino Naeseka kwikala bingi kwipi na Lesa, kimye kyonse, kwi Lesa, abyo abye bimwesho byo bimweka, byo kyubiwa. Ne bantu bakonsha kutaya bintu, kabiji bangita amiwa, amba ngye na kulomba kwi Nkambo, na kwipuzha pepi po kiji. Nobe Yese byo alubakenye ba myule, kabiji ne bansongwalume baile na kukeba ngauzhi, kabiji aye wibabujile ba myule jo babwelela ku muzhi. Nanchi ne bikwobotu byonkabya, akyo kijitu bulongo. Pakuuba kisenda byavula bingi, bantu bavula bingi...Kechi monka muyoyo mpuzhatu ne; ke ntandatu-yonse, mwamona. Nanchi kisendatu, kikokesha bingi, kabiji pano kikufikizhatu pa mpelo kimye kyonse, poso kyafika pakifulo... .

<sup>34</sup> Kabiji akyo kyo kyalengejile balongo kutatula lufunjisho, amba Amiwa ne Nkambo Yesu Kilishitu wamweka mu mubiji. Kabiji twayuka mba akyo kyakonsha konauna Ng'ingijilo yonse mu bipimvwa, kabiji ne kuleta myendeleko pe Kilishitu ne bintu byonse. Mwamona? Nanchi ao oene mambo Amiwa kyo ne basukenya kyabaya bingi, ne kwikilekesha ponkapotu, pakuuba mba bayuke amba akya kechi kyajinga kya kwa Lesa ne, akya kyajinga kya diabola. Mwamona? Kabiji ke bantu bawama bingi. Kabiji kyamwesheshe mba aba bantu basemwa jibiji ku Mupashi wa Lesa, mambo, byo bamwene Bukine bwa mu Kinembelo, babwelele kwi Lesa, kine, monai, ponkapotu. Nanchi, akya kyamwesheshe mba Satana ubena kweseka kubapo kintu kimo na bantu; bonse bajinga ba bulesa, bantu Benakilishitu.

<sup>35</sup> Kabiji kyalengejile bavula ba mwiabo kwamba kwi ami mba, "Mulongo Branham, tuji na luketekelo lwabaya mwi obewa pa kino kimye kukila byo twajinga."

<sup>36</sup> Mambo monai, kika, na kya bupe Lesa kyo ampa, Nakonsheshe kuuba nakyo byepi? Kyataile kyaalo ku mauulu ami, nangwa, bantu. Kyotutela mba *kyaalo*, kechi ke "kosmos" kuno ne, ke—ke nsono yauma ne bintutu bikwabo. Natongola bena Kilishitu, waitabila kyakine, abo bo batoka ba...Twaamba pa *kyaalo*, tusapwila pa "bantu basemwa-jibiji," abyongwa byo twambapo, mu kyaalo. Kechi muntu yense uji muno ne, abyongwa

ke ndochi kabiji ne mateshi o tubena kwikalamo panopantanda, alwa ke—alwa ke lukungu lwa panshi lubena kubwela jibiji. Amiwa mbena kwamba pa basemwa-jibiji Benakilishitu, bantu Benakilishitu bakine.

<sup>37</sup> Amiwa mbena kupembelela muntu umo kukilukila pe amiwa ne jikwabo pa kintu kimo. Muntu umo wayishile kwi amiwa kechi papita bimye byabaya ne, ne kwamba mba, “Mwine mulanguluko, wa Kilishitu kushipila panshi, na mate Anji, ne kulenga buchimba bwa kushinga pa meso a muntu umo.” Waambile mba, “Kyabusaji bingi, aya yajinga ndochi, Aye na kushipa mate, na mate Anji kufuma mu kanwa Kanji! Kyajinga kya busaji bingi, kushipila pa ndochi, ne kulengamo machipa a kubika pa meso a muntu.”

Naambile mba, “Bino aye wabwelele kasa abena kumona.” Monai, byokiji.

<sup>38</sup> Kabiji awa muntu umo! Bashikwile kambi kokwa kwipi nakifulo kyami, mwayukatu, kizhiba kyakowelapo. Kabiji—kabiji awa muntu uji na jichikichi ja baana banji bonse kuya na koowa mu kyokya kizhiba. Kabiji aye ne mukazhaji baya, ne abo, mu kyokya kizhiba. Ndekelaiko mambo, banyenga yami. Bino amwa muji banabakazhi babena koowa, pepi nobe baji aduleendi, nangwa tuu, pajuba pajuba; banabakazhi, bonse bwa busaji ne bintutu bikwabo, kabiji banabakazhi leelo, kabiji ne koowela mu oa meema, abwa busaji ne ndochi mu tunwa twabo, ne kwi amina kabiji ne kwi ashipamo. Amiwa namukeba amba atolokele pe amiwa, mwamona.

<sup>39</sup> Baambile mba, “Inge—inge Kilishitu uji na bumi leelo, bafwainwa kumukasa na mambo abyobya byubilo bya busaji.”

<sup>40</sup> Pano nga *akyo*? Naketekela mwakwatakanya kyo Nalumbulula. Abo baya mu kyokya kizhiba, kabiji bavula mwi abo baji na misongo, kaswende, ngonoliya, ne bikwabo byonse, biji monka mwa. Kabiji ne kwibishipila mu kanwa nkabo, ne bintu byonse byonka bya, kabiji ne kwiomwa momwa byobya. Kabiji abwa ke busaji, nangwa byonkabyo?

<sup>41</sup> Nanchi, oo, ami, jino juba jo tubena kwikalamo, mulongo, nyenga! Ke kimye kya Kwiya kwa Nkambo! Kabiji Kipwilo kiji na luketekelo lumo, kabiji akwa ke Kwiya kwa Nkambo.

<sup>42</sup> Kyawama, Amiwa kechi nakonsha kuleka byobyo bintu ne; kafwako kyakulekela ne. Aye Baibolo waambila jimo amba bikekalako. Amiwa kechi nakonsha kwibilekesha ne. Bino Amiwa nakeba jiwi jami kumvwanika Mwiulu, amba Amiwa ne kinshikilwe, kimye kya Buchibishi bwa mambo byo bukafika. Amiwa ne kinshikilwe.

<sup>43</sup> Amiwa nakiketekelatu mba awe Baibolo ke Kyambo kya Lesa. Nanchi kechi kujipo kintu kikwabo muntanda, kyapusanako kwi Akyo, kyakonsha Kwikikanya ne. Bino awe Baibolo papo, abwe bo Bukine, akye kyo Kyambo



kya Lesa. Nanchi pano twayai tundonse byetu—byetu—byetu byakukoka mwela, kabiji tushinkame ku kitulu kya mutemde kya Kukokoloka kwa Mwiulu. Kabiji—kabiji twakonsha kwenda kuya kuntu kumo keesha, pano twayai tushinkame ne kuteleka ku Jiwi ja Taata Wamwiulu byonka byo Akonsha kwamba kwi atweba kupichila mu Kyambo Kyanji, twaketekela, leelo.

44 Kabiji bufuku buno, pano, bikai jipuzho jonse jicheche jo muji najo. Bino, kechi pajipo kintu kimo kyakonsha kukozhapo muntu umo ne. Inge mwauba kyokyo, nishi ke... Amiwa kechi nakonsha kukumbula jojo jimo ne, kya kutatwilapotu, mwamona. Bino obewa, *kintu kimo-kikwabo*, mwamba mba, “Kyawama, pano, inge Amiwa nauba kintu kimo, bushe Lesa waamba mba twafwainwa kuuba kikye nyi?” Nangwa, mwayuka, mepuzho acheche mu muchima obe. Nangwa, “Tuji na bya bupe bibena kwingila ne atweba, Mulongo Branham, bushe twafwainwa kwibingijisha *mujije* jishinda nangwa *mujoya* jishinda? Nangwa, twafwainwa kuuba byepi?” Kintu kimo kyo Nakonsha kupana mukumbu mu Kinembelo, mwamona. Nembaipotu kintu kimo kicheche. Nakonsha kumvwa lusekelo. Kabiji umvwe kafwako ne, nanchi Amiwa nsakusendatu mutwe wa musango umo, kabiji ne kusapwila kwi anweba buno bufuku, inge Nkambo waswa. Aje ke Pamulungu, kabiji Naikala . . .

45 Pamulungu Wapita Natatwile kuya ku Mulongo Cauble. Kabiji Naumvwine bbelu wa kipwilo wavuma, kabiji Naendaukile kuzhokoloka mu lubaza. Amiwa kechi nakonsheshe kukana ne. Abyo byobyoka. Nakumvwine, nanchi Ami—Ami—Ami natatwiletu kwiya.

46 Nanchi pano twayai tukunyike mitwe yetu ne kwamba ku Mulenga wetu, kabiji tulombe. Bushe pajipo uji na kyakubila kyapusanako? Sutulaikotu maboko enu, ambaitu mba, “Ami . . .” Kibulang’anaitu. Lesa wayuka biji pa muchima obe. Pano lamaitu kukabila kwenu mu milanguluko yenu.

47 Wakila Lesa Wazhila, Ao walengele Meulu ne ntanda na Kyambo kya pakanwa Kenu, kupichila mu milanguluko ya mu muchima Wenu, tubena kwiya mu Kyeenyi Kyenu, kupichila mwi Yesu Kilishitu, Nkambo yetu, na kupana kwi Anweba lusachilo pa byonse byo Mwitubila. Kabiji twasata bingi kwi Anweba, Nkambo, lukeelo luno, pa kuyuka po twaimana, pa kuyuka kifulo kyetu kyo tujimo lukeelo luno, kabiji ne jishimikila ja kimye, kabiji ne bintu bya kulutwe bibena kwiya. Byo twayuka leelo, amba kupichila mulusa lwakwa Lesa, amba atweba twaomvwewa mu Mashi a ku Kalvali, amba twinengezha, na lwitabilo mu michima yetu, na kumukumanya Aye inge wakonsha kwiya leelo. Twafwainwa kwamba mba, “Nangwa byonkabyo, iyai, Nkambo Yesu.”

48 Kabiji byo tubena kumona bubi kasa bubena kuya na kuvujilako, poso kyamweka nobe ntanda ibena kusukana na

kinemenezhi kya ububi. Byo kuji kutoma ne kuteya ngyuka, kuba kyongo, ne kwikala bwamba, kabiji, Anweba Lesa, busaji, ne ndochi kabiji ne mateshi pa bantu. Kabiji abo, inge bakonsha kuvulukatu, Nkambo! Bushe baabo bantu, bamvwala yewa musango wa twakuvwala tuheche twabula munema, kabiji ne kulupuka mu mukwakwa, bushe bayuka mba kafwako byo baji ne pakuuba bilongolo ne lukungutu, kyakuuba mba mu mulungu mukwabo bilongolo bikajanga yewa mubiji ye babena kutumbijika? Bushe balanguluka mba mizambo ikamuja, kabiji mweo wabo ukekala mu Peenape kwakubula Lesa, kwakubula Kilishitu, kwakubula luketekelo ne, kwibizhiwa mu kubula luketekelo, ne kupembelelatu konaukwa pa Kwiya Kwanji? Anweba Lesa, tupai mawi a—a lujimuno, kyakuuba mba twakonsha kupana lujimuno ku mweo yense na bubwe bulemo bubena kwiya.

<sup>49</sup> Ikalai ne atweba leelo. Tupai “byambo bya maana,” nobe byaambile Solomoni kimye kimo Mumusapwishi, amba twakonsha kwikala “banshimikinshi bamaana,” pakuuba mba twikale ba “bakafunga bajije jibumba.” Kabiji twalomba, Nkambo, namba byo tubena kukeba byambo bya kwamba, amba bakonsha kwikala—bakonsha kwikala bipasha bya kukwata muchima wakajilwa bingi lukeelo luno.

<sup>50</sup> Atweba kechi twaiya na kubungakana mushi ya mutenge wakaba leelo, amba betumone ne, bino twaiya kuno mambo twi mutemwa Anweba, kabiji mambo tubena kukeba kumvwa kwi Anweba. Anweba mwi Mutemwe etu ye twatemwa, kabiji twakeba kumvwa Byambo kufuma kwi Anweba. Twasata pa byo twaumvwa kala. Bikale ne atweba kimye kyonse. Pano tupai kibese Anweba kyo mwitutujila leelo, byo tubena kupembelela pe Anweba. Twikipuzha mu Jizhina ja Yesu, kabiji ne pamambo Aaye. Amena.

<sup>51</sup> Pano ke... [Nyenga waamba mujimi, mulongo walumbulula—Waku.]

<sup>52</sup> Twasata bingi pa bibye byambo bya lutundaiko kufuma ku Mupashi, betubuula kabiji ne kupana lujimuno pakuuba mba tumone Byambo abyo Mupashi Wazhila byo asa kwamba kwi atweba leelo. Kabiji atweba kechi twayuka Aye byo etulamina ne, bino twayuka mba kwafwainwa kwikala kintu kimo Aye kyo abena kwituletela. Kapopo jipuzho jiji pa milanguluko yenu, Aye usakwijamba monkamwa. Aye wakonsha kwikyamba kupichila mu Mbila lukeelo luno. Aye wakonsha kwikyamba bufuku bunu mo mpwijilo. Aye, patu pamo leelo, Aye ubena kweseka, kumweka nobe, ubena kujimunapo muntu umo amba akwatakanye Byambo.

<sup>53</sup> Pano kuzhikula mu Kyambo kyanembwa, twayai tuye mu Buuku wa Kulupuka, mu lufunjisho lwa pa Mulungu.

54 Bushe muji na lubatizhilo lwa mu meema nyi? [Mulongo Neville waamba mba, “Ine, kafwako poso sikisi koloko ya mabaanga abufuku.”—Waku.] Ine. Lubatizhilo lwa mu meema luji pa sikisi mabaanga ano.

55 Twayai tuye ku kyapitala kyabu 17 kya Kulupuka, kabiji kutatwila na—na veeleshi wabu 5, Naketekela, maveleeshi abu 5 ne 6 amu kyapitala kyabu 17 kya Kulupuka.

*Kabiji YEHOBA waambijile Mosesa mba, Yanga kumeso a bantu, kabiji ukasendemo bamo ba mu bakulumpe ba bena Isalela; ne kamama kobe, ko wapumineko pa mukola, ukasende mu kuboko kobe, bino ukayenga.*

*Talai, Amiwa nkemana ku meso obe...ponka pa jibwe ja Holeba; kabiji...ukapuma pa jibwe, kabiji mukafuma meema, ne bantu bakatome. Kabiji Mosesa waubile byonkabyo ku meso a bakulumpe ba bena Isalela.*

56 Pano inge Nakonsha kutela yuwe mutwe mucheche wa Sukuulu wa Pamulungu, Nakonsha kutemwa kusenda lulwe lufunjisho lwa lukeelo luno, *Aa Meema-Atanwako Kimye Kyonse Kufuma Ku Jibwe.*

57 Twayuka mba Isalela kimye kyonse wajinga kyakumwenako kyawama bingi kya kipwilo. Mambo, Isalela wajinga bantu bakwa Lesa poso byo bafumine mu Ijipita, kabiji nanchi bajinga kipwilo kya Lesa mambo abo baabenwe kufuma ku ntanda yonse.

58 Kabiji umvwe twaabanwa kufuma ku ntanda yonse, popo twikala ke kipwilo. Bino kikulutu twimvwanga na ntanda yashala, nishi atweba kechi tuji mu kipwilo ne. Pano Naketekela mba akye kisakuya pazhika, kisakufika pa kifulo kyakyo. Monai, kechi twi kipwilo ne poso twaabanwa kufuma ku ntanda. Yi abanyai aweba bene, fumai mu kachi ka bantu ba bubipisho, kechi mwingile nabo ne, kabiji kechi mwikale bakutambulako kubi bwabo ne. Kechi mwikase ku kikokoji kimo na babula kwitabila ne, pakuuba yi abanyai anweba bene kufuma ku bintu bya muntanda.

59 Kabiji Isalela byo ajinga mu Ijipita, bajinga bantu bakwa Lesa. Pano byo baichilwe, nangwa byo balupukilenga, kulupuka, popo baichilwe mba kipwilo, mambo kyajinga ponkapa po beabenye abo bene kufuma ku ntanda yashala.

60 Kabiji kyonka kyambo kya *kipwilo* kyalumbulula mba “baitwa.” *Exodus*, “kulupuka.” Yense mwi atweba, nobe Benakilishitu, twaikala na kulupuka mu bumi bwetu. Twajinga na kimye kyo twaichilwe kufuma mukachi ka balunda netu, twaitwa kufuma mukachi ka bantu bo twajinga nabo na lumvwang’ano, ne kwikala bantu bapusanako, ne kwenda na bantu bapusanako abo baubanga byubilo byapusanako ne

kwamba mu jishinda japusanako. Kwajinga kulupuka kwa bumi bwetu.

<sup>61</sup> Kyajinga kyakumwenako kyawama bingi kitupele Isalela, kya kimye Lesa kyo ebechile. Bajinga na kulupuka, kabiji bafumine mukachi ka—ka bantu ba muntanda, kabiji baikele kyaalo kya baabenamo, kwi Lesa, bantu bapusanako. Abo ba endelenga mu bivule bya kipona kya lusa. Abo baikele ne kwenda kulubaji lwa Mumbulungwa wa Mujilo mukatampe. Kabiji Lesa wibalupwile kufuma mu Ijipita, kuya ku ntanda Yo alaile.

<sup>62</sup> Kabiji, mu kukwe kulupuka, bapelwe ntangi wa bumupashi, ntangi, ao wajinga Mosesa, ngauzhi mukatampe washingwa manyi wajinga— muntu mukatampe. Aye wajinga muntu wabulesa, aye wasemekelwe muntu wabulesa. Lesa wamwichile kufuma munda mu bainaji, akya kimye kasa kikyangye kufikila; Lesa wamutongwejile jimo kintendekesho kya inontanda kasa kikyangye kwaalwa, kwikala tangi pa kyokya kisemi, mu kuleta kukwe kulupuka ku bantu.

<sup>63</sup> Kuno kimye kimo kunyuma, Naambile ku baana babacheche muno mu tabbanako, kabiji najinga na busapwishi bwabo bucheche; ne kwibabula, nangwa kupana kya kumwenako kicheche na byaubile Yokabendi, byo alombele, aye ne Amilamu, bashanji Mosesa, mambo a kubapo kintu kimo kya kupokolola bantu. Kabiji Amilamu wamwene kimwesho kya kwa Lesa kasa aimana, nangwa kya Malaika, watongwelenga ku kabeta kabuyeke, ne kumubuula bintu bikamweka. Kabiji Mosesa wa mucheche wasemekelwe. Kabiji kechi bachiine mikambizho ya mfumu ne, nangwa bya kuchinisha. Bayukile mba Lesa wajinga na kuboko Kwanji pe Mosesa, kabiji akya kyapwishishe byonse. Abyo ibyo. Nangwatu mfumu waambile byamusango ka, bamulwila ntanda bambe ka, nangwa bashala bambe ka, bayukile mba Lesa wajinga na kuboko Kwanji pe Mosesa. Nanchi abo kechi bajinga na mooyo wakumuleka, mukachi ka biwele ne; byo bajinga bonse banuna na baana bacheche Bakihebelu, byo bebapaine na kwibaja ku biwele. Bino nangwa byonkabyo Mosesa wabikilwe mu bwato bwa bucheche ne kumubika monka mu biwele, monka mukachi nkabo. Mambo, kechi bachiinepo kiji kyonse ne, abo bayukile mba Lesa wabika kuboko Kwanji pe Mosesa.

<sup>64</sup> Kyawama, pano, inge twakonsha kuyuka kintutu kimo, amba Ntangi wetu mukatampe, Mupashi Wazhila, Lesa Ye wamutumine, kabiji Aye ye Ntangi wetu, kabiji nangwa ntanda yambe ka, nangwa bakuseke byepi ne kukuletela bisela, atweba tulondela Ntangi wetu! Lesa watumine Mupashi Wazhila kwikala Ntangi wetu. Mwamona? “Pa kakimye kacheche bapano pantanda kechi bankamona Amiwa ne. Bino anweba mu Kamona, mambo Nkekala nenu, ne mwi anweba, kufikatu ne kupelo ya ntanda.” Nanchi, Ntangi wetu mukatampe uji ne

atweba, aye Mupashi Wazhila. Bino twafwainwa kulondela yuwe Tangi ne kuuba byonka byo Aamba mba tube. Kabiji awe Tangi kechi uketufumya mujishinda ne, Aye uketulama monka mujishinda ja Kinembelo kimye kyonse. Bino Aye kechi ukayapo ku lubaji *lumo* na mambo a kintu kimo ne, kabiji ne *lulwe* lubaji na mambo a kintu kimo ne. Aye ukekala monka mu jishinda ja Binembelo.

<sup>65</sup> Kabiji Mosesa wajinga na mambo akuuba mba ukasenda Isalela, ne kulondela kwabuka bushiya bwa Kalunga Kachila, kwabuka Yodano, kuya mu ntanda ya mulaye, kupita mungye. Kechi kyajinga Mosesa wafumine mundonda ne. Kechi kyajinga Lesa wafumine mu ndonda ne. Kyajinga bantu bo bafumine mu ndonda, kyo kyaletete lukatazho. Nanchi, twayai tulangukepo pa bibye bintu. (Ndekelaiko mambo.)

<sup>66</sup> Mosesa, nobe tangi washingwa manyi. Kyapeleleko, byo amwesheshe ku bantu, kupichila mu biyukilo ne bya kukumya, amba Lesa bunke bwanji wakonsha kuuba, aye waubile bibye biyukilo ne bya kukumya kumeso abakulumpe bena Isalela, kabiji ne kumeso a Isalela, poso byo bashinjilwe mba awe Mosesa wajinga washingwa manyi ao wafwainwa kwibafumya mu kino kyaalo, ku yoya ntanda yawama yo bebalaila. Pano byo bamwene bibye bintu bikatampe abyo Mosesa byo aubile mu jizhina ja Lesa, abo baswile kumulondela. Kabiji wibalupwile, wibatangijile kupita mu Kalunga Kachila, baabukile kubushiya, pajinga pa mushiji wauma, ne kuya mu lwendo lwa mukiselebwa, akyo kyalumbulula mba kimye kya kwesekwa.

<sup>67</sup> Inge mulongo watambula Kilishitu nobe Mupulushi wani, bintu byonse biji peulu ya nzubo. Bino, awe muntu kasa akyangye kwiiya mu lubatizhilo lwa Mupashi Wazhila ne, awe muntu, aye patanshi wafwainwa kupita mundonda ya kutokeshiwa. Aye wafwainwa kwikala na kimye kya kwesekwa mu bumi bwanji. Anweba bonse mwajinga nakyu. Aye wajinga na kiky kimye kya kwesekwa. “Mwaana yense wiya kwi Lesa, patanshi wafwainwa kwesekwa, kufundwa, kupumwa. Kabiji inge kechi twakonsha kufundwa ne, nanchi kimweshatu mba kechi twi baana bakwa Lesa ne; atweba twi baana ba mubukende, kabiji kechi baana bakwa Lesa ne,” byo byaamba Baibolo. Bino inge twafundwa, byo twayuka mba “bintu byonse bingila kubuwame bwaboba batemwa Lesa,” nanchi atweba twi baana babalume ne babakazhi bakwa Lesa, nanchi Aye witubika katetesho na Mupashi Wazhila poso kufika ku juba ja bukuzhi bwetu. Monai, akwa ko kufundwa, kijikila, bintu byo tupitamo.

Kabiji Isalela, nobe kyakumwenako kipasha, wapichile mu kufundwa.

<sup>68</sup> Bino, byo bajinga mu Ijipita, kabiji Lesa watumine Mosesa. Kabiji aye watanyikile kamama, baluzhi ne kuso byamwekele. Aye wi itanyikile kutazha ku juba, kabiji jazhikile. Aye wi

itanyikile pa meema, aalulukile ke mashi. Kika, Isalela wajinga kokwa mu Kenana...kokwa mu—mu Gosheni, kasa baji na kimye kyawama bingi; juba kechi jazhikile ne, myalo kechi ibafikijile ne; kika, bajingatu na kimye kyawama!

<sup>69</sup> Nobe byonka byo waubile kimye kitanshi kyo wapulukile. Bintu byonse, bang'onyi baimbile byapusanako, kabiji muntu yense wajinga wawama. Kabiji, oo, ami, bintu byonse byajingatu byawama kimye kitanshi kyo wapulukile! Pano kwaishile kimye ky kwesekwa, kufundwa, kimye kya kutokeshiwa, kwitokeshwa obewa mwine ku bintu bya muntanda, “ne kusha binemenezhi bya bubi bupelawizha kwitukwata.” Obewa, muntu, walekele kupepa fwaka kobe, waleka kutoma kobe, waleka kuya mu manzubo akukaya bisela, bijilo byenu bya ngyuka bufukubonse. Byonse bye bintu, wafwainwa kwitokeshwa obewa mwine kufuma ku bibye, monka mu lwitabilo lwa mu Mashu akwa Yesu Kilishitu. Kwitokeshwa obewa mwine! Anweba banabakazhi mwalekele suki yenu yakoma, lepeshai mandeleshi enu, ubaiko byubilo byapusanako na byo mwajinga nabyo. Kimye kya kutokeshiwa! Bimye byavula bakonsha kusatuka ne kubwela lunyuma; kyawama, awa kechi ke mwaana wakwa Lesa ne, mwamona. Mwaana wakwa Lesa utalatu pa Kalvali, kabiji wayuka mba ke kya kubuwame bwanji.

<sup>70</sup> Nanchi pano aya ndonda ya kimye, apo po paishijile kupona kwabaya, mu Isalela. Kimye byo kyafikile kya kuvulakwabantu, ponkapa bantu batatwile kupona, kufuma ku lubaji lumo ne kuya ku lukwabo. Kabiji monka mukwisamba kwabo, “Kyawama, nanchi kyafwainwa twabwela mu Ijipita. Myeo yetu ikabila yuwe shinkwa utoka.” Mu mulaka mukwabo, inge Nakonsha kubwela ku jishimikila pano, abyo byo baambilenga.

<sup>71</sup> Bino mu juba jakatataka, byo kyafwainwa kwikala, “Oo, kila bufuku Pakisatu, kupwila kwa milombelo! Kila Pamulungu lukeelo, kubwela ku kipwilo! Kika kyo tumvwa? Kintutu kimo; musapwishi waimana ne kusapwila; nyimbo; ne kubwela kunyuma.” Monai, nanchi obewa ubena kuyatu mu mulaini wamwingilo. Obewa kechi wi mupopweshi ne. Mupopweshi uyako kokwa na kupopwela, na kwimweshwa aye mwine kumeso akwa Lesa wanj, kutota Lesa pa buwame Bwanji; ku Kyambo kyonse, aye Wikikwachijila.

<sup>72</sup> Kijitu pamo nobe lumvwang'ano lwa butemwe. Inge wikala na nsongwakazhi mambo wayuka mba kiji na mwingilo, nangwa obewa waikele na nsongwalume, kimye kyo wajinga mwanyike. “Bamaama babena nkukeba mba ngye na yuwe mwanamulume, bino Amiwa kechi nakonsha kumuswa ne.” Obewa kechi ujipo na kintu kimo kya kwiya aye na ku kumona ne. Nangwa, inge kiji mu musango umo nsongwakazhi ku nsongwalume, nangwa nsongwalume ku nsongwakazhi. Obewa waya nanji, wakulengela kubula lusako; bamaama bakeba obewa kuya nanji mambo wi musango bamaama ye bakeba. Monai, kikulengela

mukose; kafwapo lumvwang'ano lwa butemwe ne. Bino obewa kechi utako muchima ne, obewa kechi ukeba kwitokesha ne, obewa kechi ukeba kuya na kumumona ne. Kabiji kiji ke. . . Kika, ke kintu kyatama bingi. Kabiji umvwe ubena kwiya na kukumona, ami, obewa ulangulukatu mba apelawizheko, kuya ku muzhi.

<sup>73</sup> Abyo byobyoyo kiji umvwe obewa, “Kika aye kyo asapwila bimye byabaya? Pano ngaabye *bintu* byonse, ne bintu byonse?” Monai, kechi uji mu butemwe ne.

<sup>74</sup> Pakuuba umvwe kine wakwachijilatu pa Kyambo kyonse, nobe monka mwapaina lujimuno Mupashi lukeelo luno, monai, “Kukwachijila ku Kyambo kyonse.” Abyo byafwainwa kwikala byo abena kwambapo. Kukwachijilatu! Ke Bumi Bwapeenape, Kyambo kyonse kya Lesa. Ke kyalusekelo kuya ku kipwilo, mu musango uji yense. Nangwa kwakaba, kutalale, kipusaneko, nangwa bantu bendeleke, banyinyite, kiji kyonse kyo babena kuuba, kikijitu lusekelo pa kumvwa Kyambo kya Nkambo. Nanchi uji mu butemwe ne Kilishitu, monai, watemwa kuya ku kipwilo.

<sup>75</sup> “Kyawama, mutemwe, pano ke pa Mulungu lukeelo jibiji, Naketekela mba twafwainwa komvwa banyike ne kufikako. Ami, kuji mukose!” Mwamona, obewa kechi uji mu butemwe ne.

<sup>76</sup> Bino umvwe kine uji na butemwe, kechi wakonsha kupembelela poso ja pa Mulungu jafika ne, wafwainwa kufikako kokwa nkobaji. Kabiji twafika, ne kufumako. . . Bantu bakwa Lesa, kechi ba kulengela mukose ne. Kika, abo ke—abo ke balongo ne banyenga. Nobe byonka byo Naambanga, “Waikala wanemenwa nobe muzungwe wa myenge ya Mebele mu kimye kya lukeelo lwa mashika.” Kechi—kechi uzuzuluka ne, wikwatatu pamo, mwayukatu, kikosatu bujibwe. Bino, ayo ke ng'ambilo ya bwitote, bino ke—ke—ke kweseka kwimuyukisha mo Nekitazha, mwamona. Anweba mwakwatakana pamo. Kabiji monka mubaila munyango, ne kukosa mo kikosela kwikwata. Kabiji abyoyobyoyo kyafwainwa kwikala ne atweba. Monka mubaila munyango. . .

Umvwe balunda ba pantanda bakana,  
Ikalatu wakwachijila kwi Aye!

<sup>77</sup> Kabiji byo twitemwa, umo ne mukwabo, kechi mambo akuuba mba paji byo tuji ne; pakuuba ke Kilishitu umo mu mukwabo, akyo kyo tutemenwa, mwamona. Ke Lesa uji mu buntu bwetu, pakuuba mba tutemwe. Pano twatemwa kwiya pamo. Twaimbanga lwimbo wakala:

Kipeshiwe akya kyakasa pamo  
Michima yetu mu butemwe bwa  
Bwinakilishitu;  
Lumvwang'ano lwa bupopweshi bwa bamaana  
amo

Kijitu pamo nobe oa aji Peulu. (Mwamona?)  
 Lumvwang'ano lwa bupopweshi bwa bamaana  
 amo  
 Kijitu pamo nobe oa aji Peulu.  
 Kumeso Ajitanda ja kwa Taata,  
 Ko twaitulwila milombelo yetu;  
 Moyo wetu, luketekelo lwetu, po twaimena po  
 pamo,  
 Lutekenesho lwetu kabiji ne bya kusakamana  
 byetu.

<sup>78</sup> Mwamona? Ee, mwane! Umvwe umu uji na mapesho, atweba bonse twikalala na lusekelo pa kyokyo. Umvwe umu uji na bulanda, tuji nanji pamo bulanda. Atweba—atweba tukeba bonse kwikalala pamo. Bino ajo jo jishinda jo twafwainwa kwikelamo.

<sup>79</sup> Kabiji ajo jo jishinda Isalela jo afwajilwe kwikelamo. Bino kikalatu ke kisendwa, “Oo, akye kyeya kyashinkwa wakala!” Shinkwa wa Bamalaika, “Kyawama, kika kyotusakamena pa yuwe shinkwa wakala? Myeo yetu ikebesha bibye bintu! Kabiji byonse byashala byatama. Kabiji—kabiji ao manna akala apona kila bufuku, kika, kyawama kuja galiki ne kanyeze wa mu Ijipita.” Mwamona, michima yabo kechi inengezhe kwikalala pa lwendo ne.

<sup>80</sup> Kabiji inge mwanamulume nangwa mwanamukazhi watatula kwijizhanya pa kuya ku kipwilo, bekala bakoka kuya ku kipwilo, kechi benengezha kwikalala pa lwendo ne. Abyo ibyo. Pajipo kintu kimo kyatama pantu pamo.

<sup>81</sup> Oo, inge watemwa Lesa, kabiji ne kulanguluka mba ubena kuya Mwiulu, kabiji anweba bonse mubena kwendela pamo:

Lumvwang'ano lwa bupopweshi, ke lusekelo  
 lwa Bulesa,  
 Washakamina pa kuboko kwa myaka;  
 Oo, mutende wapeshiwa wa Nkambo yami uji  
 pepi bingi,  
 Washakamina pa kuboko kwa myaka.

Awa ke . . . Twimba yoyo nyimbo.

Tushilang'ena pamo makatazho etu,  
 Twisendela pamo bisendwa;  
 Kabiji bimye byavula pa makatazho abakwetu  
 Kushilang'enga mipolo ya bulanda.

Byo tukabenamo,  
 Kitupa misongo ya mukachi;  
 Bino tukekala bakwakatakana mu michima,  
 Kabiji naketekela kusambakana jibiji  
 pa kimye kya milombelo. (Ee, mwane,  
 twakikwatakana pamo mu muchima!)



<sup>82</sup> Pano obewa ubena kwiningezha kwikala pa lwendo, monai, obewa winengezha kuya mu Ntanda ya mulaye. Bimye byakwesekwa, kuji kifulo kyabulwanyani; mungyetu, kimye kya lweseke.

<sup>83</sup> Isalela, mu kimye kyakwesekwa kwanji, batatwile kutoboka ne bya kisangajimbwe umo na mukwabo, ne kukabila kwa shinkwa. Kabiji bakebelenga kubwela ku Ijipita.

<sup>84</sup> Kabiji nanchi batatwile kwijizhanya na ntangi wabo. Oo, bajinga na moyo wakwamba mba ubena kwibatwala mungi; panyuma ya kwi mwesha ayemwine mba tangi, kabiji ne Lesa washinikishe mba wajinga tangi. “Kyawama, kapepo twaubila mungi pacheche. Kabiji—kabiji kapepo amba twaya mungi, bonse baya mungi,” nangwa, kintu kimo kiji byo bya, mwamona, baambilenga byambo byatama kwio Lesa ne kwini Mosesa, Lesa ne tangi Wanji.

<sup>85</sup> Pano umvwe twafika pa kifulo, ne kwamba mba, “Amiwa kechi nayuka ne kana Kyambo kyalumbulula *Kikye*, nangwa ine,” kabiji, “Amiwa kechi nayuka pa Mupashi Wazhila ne; Amiwa nazhinauka pa Kyokyo. Nayuka bakwabo babula kyokyo ne.” Kyawama, yaingatu ku Ijipita. Mwamona?

<sup>86</sup> Bino inge kine mwaswa kwikala pa mukwakwa, ikalai bulongo na yuwe Tangi, aye Mupashi Wazhila, ikalai bulongo na Kyambo. Kabiji umvwe mwaikala na Mupashi, Ukemulama mu Kyambo. Abyo ibyo. Kikakubika monka mu mulaini, jishinda ja mu Kyambo. Kabiji kechi mwakonsha Kumuchina ne. Kechi ukakozhapo nangwa umo ne, Ukakukwasha umvwe wakozhiwa. Ukakubuka kyonse kikozechang’ana, Mupashi Wazhila wakonsha.

<sup>87</sup> Pano twatana kuuba mba, mwaya yuwe mukwakwa, panyuma ya kuya bibye, bafikile pa kifulo kya Holeba. Kabiji H-o-l-e-b-a, Holeba, panon twatana kuuba mba... Twayai twabanye jojo jizhina. Apo popaji—jizhina ja *Holeba* jalumbulula mba “mpuzha yauma” nangwa mba “kiselebwa.”

<sup>88</sup> Kabiji umvwe twafuma mu lumvwang’ano lwa bupopweshi umo ne mukwabo mu kipwilo, kabiji twafuma mu lumvwang’ano lwa bupopweshi na Mupashi Wazhila, kituleta pa kifulo kyauma, kiselebwa, kafwako kyumi ne, bintu byonse bikalatu na bilamachila. Monai, ki—kiselebwa, kilambwe kicheche kiji na bilamachila. Bushe mwayuka akya byokiji nyi? Aja ke jibula jicheche jawama jabula kutambulapo meema, kikasatu pamo akyo kine poso kyaikala na bilamachila. Kabiji inge mwamona muntu umo uji byobya, kapepo ke mweo umo wawama wafwaijilwe kutekezhiwa na meema bulongo, wafwaijilwe kwikala jibula jicheche janekena nangwa kintu kimo. Bino mukifulo ya kyokyo, kikasatu pamo akyo kine poso kyaikala kilamachila, akyo kyasatu paji pose, mwayukatu, kutaanamo lukatazho paji pose. Kintutu kyo kikeba ke meema. Kyo kyonka. Akyo akyo kikebatu—kusangululwa, nangwa kulajika,

kusangululwa kwa kufuma kwi Nkambo. Ki ke—ki ke lumbulula akyo kine, inge mwakonsha kwikibikatu ku meema.

<sup>89</sup> Bino, abyo aba bekala mu kyokya kifulo byo bafwainwa kumanama na bintu bitanwa muyoya mpuzha. Kabiji aba bakeba kwikala mu bwikalo bwamusango yewa, paji bintu byonse bibena kwasana ne bya mapata, ne kutoboka ne bukaji byobya, kyawama, anweba mukekalatu muyewa musango, byo byonka. Bino kechi twafwainwa kwikala kokwa ne, kechi kiji na mwingilo wakwikela kokwa ne.

<sup>90</sup> Bino, awe Holeba kyajinga kifulo akyo Lesa kyo abulanga kutundaika bantu, mambo abo baile mu iye mpuzha kabiji ne kutwela mu yuwe musango. Kabiji Aye wibaletele monka, mambo akuuba mba bakakelwe kwenda mu jishinda. Abo bafuminemo mu—mu mwiine mukwakwa, bafuminemo ne kuya kululwe lubaji lwa jishinda. Kabiji pano kyalengejile Lesa kuuba kintu kimo kyaaletele moyo. Aye. . . Kyalengejile Lesa wasenda Mosesa amba atole kamama ka buchibishi bwamambo bo azhachisheko kyaalo, ne kupuma ku Jibwe, pakuuba mba kufume meema.

<sup>91</sup> Pano, paji lufunjisho lwawama bingi papo inge twakonsha kwilutambula, mwamona. Kabiji mambo akuuba mba twafuma mundonda, ne kukaswa na ntanda, ne bintu bikwabo, kyalengejile Lesa kusenda buchibishi bwa mambo bwa ntanda ne kupumako Mwaana Wanji Mwine, pa Kalvali, pakuuba mba twikale bakasuluka. Mwamona mo Nekitazha nyi?

<sup>92</sup> Pano, pakuuba mba tulatele bantu ku meema, panyuma ya kufika kokwa, aaye mpuzha yauma yalengelwe ke Kalvali. Kabiji Lesa wabuujile Mosesa mba, Waambile mba, “Tola kamama kabiji ne bakulumpe, ne kuya kulutwe, kabiji Amiwa nkemana pa Jibwe kumeso enu.” Kabiji jije Jibwe jajinga Kilishitu. Kabiji Mosesa, na kamama ko aleteleko buchibishi bwamambo ku kyaalo kya Isalela, watolele konka kamama kamo ne kupuma buchibishi bwamambo bwa Lesa pa Jibwe. Mwamona? Aye watolele bubi bwa bantu ne kubika pa kanko kamama. Abo, bo afwaijilwe kupuma bantu. Mukifulo kya kupuma bantu, aye wapumine ku Jibwe. Kabiji Jibwe, kupichila mu mwingilo wakwa Lesa, jaletele lupulukilo, jaletele meema ku bantu babena konaika. Kyaaletele bumi ku bantu babena kufwa. Kabiji abyo Lesa byobyo aubile pa kusenda Kanji—kamama Kanji ka buchibishi bwamambo, kabiji kupomba bubi bwami ne bubi boobe kuzhokoloka kanko kamama; kafwaijilwe kwitupuma, pakuuba kyafikijile Kilishitu; kufuma kwi Aye kwafumine *meema*, kyalumbulula mba “Mupashi,” aye Mupashi Wazhila wafumine kwi Aye, mu kupana Bumi kwi atweba. Pano tuji na Bumi Bwapeenape. Pano, aja Jibwe jajinga Kilishitu. Pano twakeba kumona.

<sup>93</sup> Amiwa namona kulenga kwavula kwa bumuntu kwa jije

Jibwe. Namwenepo kimo kyawama bingi, kechi papitapo kimye kyabaya ne, poso kwajinga ka—ka jibwe ka kacheche kaikala peulu ya katumba. Kabiji—kabiji Mosesa wafwaijilwe kupuma ku jije jibwe, kabiji Isalela wajinga momwa na kapu wa makabe, ne kwibatomesha tumeema tucheche twakusansa twa ponene ku jije jibwe. Pano ayo ke milanguluko ya muntutu umo.

<sup>94</sup> Pakuuba jije Jibwe byo jaletele meema Ajo, akwa kwajinga bantu tuu milyoni, kufumyako bang'ombe, bangamela, kabiji ne kiji kyonse kyangatomene meema kufuma kwi Anjo. Kyajinga ke nsulo ya kakola kafumine momwa!

<sup>95</sup> Ajo jo jishinda jo twesekelamo kulenga Kilishitu, Mupashi Wazhila leelo. “Ke kusasatu pacheche.” Monai, kuji aesakanatu a kukulengela obewa akuketekela mba kuji Lesa. Ine.

<sup>96</sup> Ke Meema avula bingi! Davida waambile mba, “Kapu wami wayula!” Ke nsulotu ya meema a Mupashi Wazhila.

<sup>97</sup> Bantu baji Nanji na moyo. Bantu bamo baamba mba, “Kyawama, Amiwa naumvwatu moyo pacheche Nakonsha kuuba *kikye* nangwa *kyokya*, nangwa inge Naya pazhika kimye kicheche. Nakonsha kwimumweshwa mba muntu umo waile palepa bingi.” Bino kechi mwakonsha kutongola ku yewa wabula kuyisha palepa ne. Mwamona? Ee, pano nga aba babula kuyisha palepako?

<sup>98</sup> Bino, twajinga na bantu bamo batwelele ku mubiji, kabiji bafuminemo ne kuya mungi. Kabiji—kabiji kechi Lesa ne, bino bantu baji na... Mambo akubula butangi bwawama, ne bikwabotu, bafumine mu jishinda jawama, ne kuya mu ja myendeleko. Kabiji pano ntanda yonse, diabola wibatongola, “Mwamona kyokyo! Mwamona kyokyo!”

<sup>99</sup> Kyawama, lekai ngimane lukeelo luno ne kutongola ku bao mamilyoni teeni bakila booba bakyangye kutatula ne. Pano nga abo? Monai, talai pa musango wabo. Talai pa shetu nobe Eichmann leelo, uji na bavujisha... Baamba mba, “Ba pentekosito babula musingi ne kuuba bintu byenyi, kabiji kechi bafunda ne,” ne bikwabotu byokabya. Talai pe Eichmann, ye umo wabooba bafunda bingi mu ntanda. Kabiji waipaile, baana ne banabakazhi ne banabalume sikisi milyoni, myeo sikisi milyoni. Anweba kechi mukeba kutongola ku muntu uji byobya ne.

<sup>100</sup> Bino ke mulunda umo mucheche wakonsha kubula kutanga, nangwa pachechetu ne, watongwele jizhina ja Baibolo kapepo mujishinda jingi, kabiji, nangwa kape waambile kintu kimo nangwa kintu kimo kyangatama ne, nangwa waubile kilubo, napepala a byambo bakeba kwikinemba pose pose, ne kwamba mba, “Kechi baketekelwa ne.”

<sup>101</sup> Nanchi inge kechi kyakonsheka kwikiketekela ne, kika kyakubujila kufunda, bintu kabiji ne maana a bumuntu bo aji

nao leelo? Talai kwi Adolf Hitler. Talai pa maana a ntanda leelo. Talai pe abo. Ng'ambilo yakala, "Sulo ya jishipe ke shikombwe."

<sup>102</sup> Kintu kyo wafwainwa kuuba ke kukonsha, na Mupashi Wazhila, ke kwabanya kyaitabilwa ne kyatama, kabiji ne kusendapo kyaitabilwa ne kyatama.

<sup>103</sup> Bino, twatana kuuba mba awe Kalvali ye bajinga nanji, kabiji ne meema a bumi byalupukile kuya ku bantu.

<sup>104</sup> Bino, bantu bamo bajinga mu michima yabo ne milanguluko, amba Isalela yense watomene, kabiji nanchi baimenye bangamela babo ne kukasa mishipi ya bambili baabo, ne bikwobotu, kabiji basendele baana babo ne kwikala palwendo lwa kuya kuntu kumo, kabiji bashiile Jibwe kokwa, na kusansa. Akyo kingi.

<sup>105</sup> Aja Jibwe jibalondejile, kabiji ne oa meema ebalondejile. Pano mu Kolinda Mutanshi, kyapitala kyabu 10, Naketekela, kabiji ne veeleshi wabu 11, mwakonsha kwikitana, amba "Aja Jibwe jalondejile Isalela." Konse kobaile kufuma pa joja juba ne kuya kulutwe, Jibwe jaile nabo, kabiji ne meema ebalondejile.

<sup>106</sup> Ke kipasha kyawama bingi, kabiji ke—ke kintu kyawama kukoselako ne kwimenako waitabila leelo, ao wayuka amba aja Jibwe jo bapumineko kimye kimo, aa Meema aichikile kufuma ku Kalvali, aya ne atweba konse kotuji! Oo, ami! Kechi abena kubwela pa kifulo kikwabo ne, ne kwaamba mba, "Kyawama, twajinga na Meema mansoshi, kunyuma kokwa." Tuji na Meema leelo, ponka pano, mambo aja Jibwe jajinga Kilishitu! Kabiji Kilishitu ujitu pamo keesha, leelo, ne myaka yonse.

<sup>107</sup> Monai, aja Jibwe jalondejilenga Isalela. Abo kechi balondejilenga Jibwe ne, pakuuba Jibwe jibalondejilenga panyuma. Amena. Isalela wailenga pa lwendo lwabo. Bajinga bino na kintu kimo kya kuuba, ko kuuba mba, kulama jishinda jaoloka, jaoloka kuya mu ntanda ya mulaye. Kabiji Jibwe ne meema bibalondejilenga.

...aja *Jibwe jibalondejilenga abo*: . . .

Mutanshi Kolinda witubuula byoabyo, kyapitala kyabu 10. Kijitu bulongo.

...aja *Jibwe jajinga Kilishitu*.

<sup>108</sup> Lesa watolele buchibishi bwa mambo bwa bantu kabiji ne kwibubika pe Kilishitu, ne kumupuma Aye. Bushe mwamona, kwajinga kitebuke ku Jibwe, kufumatu ponkapa? Aja Jibwe jajinga na kitebuke mwi ajo, kulubaji kwapumine Mosesa. Kabiji Kilishitu wajinga na kitebuke, kimye Aye kyo bamupumine, "Aye wamanyikilwe namambo amizhilulwila yetu, kabiji mo mu bipumo Byanji mo twabukijilwe." Mu bobwa Bumi mwafumine Meema a Bumi ao otwamwenamo lusekelo leelo!

<sup>109</sup> Pano, pakuuba mba twikale na bubwe Bumi, vulukai, Bumi bwa Kilishitu bwaikala na Kipwilo. Aleluya! Oo, inge

twakonsha kwikajika milanguluko yetu pa mamineti teni asakulondelapo! Kilishitu kechi usha Kipwilo ne. “Amiwa nkekala ne anweba kimye kyonse, kufikatu ne ku mpelo ya ntanda.” Ke bantu bobasha Kilishitu, kechi Kilishitu ye usha bantu ne. Bantu bo Bamusha, monka mu kubula luketekelo lwabo. Basha Kilishitu, kechi Kilishitu kusha bantu ne.

<sup>110</sup> Isalela ye washile mukola, kechi mukola ye washile Isalela ne. Mwamona? Mambo, Baibolo waambatu patoka mba, “Aja Jibwe ne meema byalondejile Isalela.” Jibalondejile! Konse ko baile, Jaile, ne ajo.

<sup>111</sup> Oo, Nakonsha kutemwa, lukeelo luno, inge twajinga na kimye, kya kuzhikula mu kyapitala kyabu 1 kya Yoshiwa, amo Aye mo aambile mba, “Pose pa kanyata mauu enu, Nemupa. Konse ko ukaya, aye Yehoba Lesa obe uji ne obewa. Kuchina muntu nangwa umo ne. Ikala wachichika! Pose po ukabika ngayo yobe, Amiwa kekala nobe, nangwatu kikale byepi.” Lesa kuya ne Joshiwa!

<sup>112</sup> Aye Lesa umo uya na Kipwilo Kyanji lukeelo luno. Twayai tutome ku iye Nsulo kubushiya. Pose po ukabika ngayo yobe, apa ponka Lesa popo akekala ne obewa, mu kupana meema ne Bumi. “Amiwa kekala ne anweba kimye kyonse, kufikatu ne kumpelo ya nkulo.” Kilishitu ujitu pamo keesha, leelo, ne myaka yonse. Mizhilo ya Lesa.

<sup>113</sup> Pano mwamba mba, “Nanchi, Mulongo Branham, kika kyo tubujila kuuba bintu byo twafwainwa kuuba? Kika bya bupe byetu ne bintu mu kipwilo kyo bibujila kufika pa musombelo wabyo, po byafwainwa kufika? Kika kipwilo kyetu kechi kishikulwa kufika pa kifulo po kyafwainwa kufika ne?” Bantu, mu kimye kya kwesekwa, bapona byonka bya ubile Isalela. Balanguluka mba Lesa wibasha.

<sup>114</sup> Bino, vulukai, Jibwe kechi jashile Isalela ne. Isalela washile Jibwe, bejilubileko Jibwe amba baji najo kimye kyonse. Bajinga najo ponkapa, baile najo kufika ne kupelo ya mukwakwa. “Jibalondejilenga.” Kechi jajinga palepa pa kukakalwa kwamba ne. Kechi jajinga palepa pa kukakalwa kumvwa ne. Nangwa, kechi jajinga palepa kya kukakalwa kumona ne.

<sup>115</sup> Kabiji nangwa Kilishitu ne! Na Kipwilo leelo, Aye kechi uji palepa pa kukakalwa kwamba ne. Anweba bamo mwabwela panyuma, kabiji mwauba bintu byatama, kabiji mwataya lolwa lusekelo, ne Meema obe auma. Aye ukijitu pa musiso wakufwainwa kwamba. Aye ukolondela. Aye wayuka ng’endelo yobe yonse ne bintu byonse byo uba. Aye wakabila kukumvwa obewa Kumwita pa kyokya kifulo.

<sup>116</sup> Kabiji aye ng’endo ikatampe ya Kipentekosito leelo, Lesa ubena kukupembelela kumwita Aye pakyokya kifulo. Obewa kechi uji palepa pa kukakalwa kwamba Nanji ne. Nangwatu twauba kintu kyatama, ne kulenga mambo, ne kuvundaminako

manyuma enu kwi Aye, kabiji—kabiji ne kuuba bintu byo twafwainwa kubula kuba ne, bino nangwa byonkabyo Aye uji ne atweba. Kilishitu waambile mba Ukekala ne atweba.

<sup>117</sup> Aye Baibolo waamba mba, “Meema alondejilenga baana ba Isalela.” Byo bafwile kilaka, bayukile mba meema ajitu pepi.

<sup>118</sup> Pano, abye bintu bitangijilwa na mizhilo. Yonse ntachikilo yakwa Lesa yabikwako na mizhilo. Pano tusa kusenda... Twayai twimane pa mineti umo.

<sup>119</sup> Twayai tutole ntanda. Izhokoloka, pa ma awala tweti-foolo yalenga kuzhokoloka kwapwijijika, kwalumbuluka bingi, kuuba mba... Kechi twakikalapo, na saayasi wetu yense, kulengapo koloko yakonsha kulama kimye kyalumbuluka ne. Pakimye kiji kyonse, makoloko awama o balengapo kala, pa kupwa kwa mwaka, avujilako nangwa kutaya ma mineti. Pakuuba ntanda kechi ikakalwa ne bino ifikilamotu pa sekondi umo. Kyafikilamotu bulongo poso masaayatisiti leelo, ne basendwe wa bya mwiulu bakonsha kwimubuula, mu myaka tweti kufuma pa kino kimye nangwa myaka fifite kufuma pa kino kimye, juba ne ng’ondo bikapusana kimo na kikwabo pa kimye kimotu. Inge yazhokoloka kizhingu kya tweti-foolo kimo, kabiji izhokoloka kimye kyao mu kimye kimo, kechi kipusa nangwa pamo ne. Aleluya! Akyo kyalumbuluka, mambo kibena kunyema mwaila muzhilo wa Lesa.

<sup>120</sup> Abo bayuka ponka pakyokya kimye kupita kwa manyaki, ponka pa mineti umo, mambo bayuka kimye ng’ondo kyo apona. Kabiji Lesa uji na byonse mundonda ya mizhilo. Kabiji umvwe awa mwezhi wazhika, manyaki aya nanji pamo. Umvwe awa ng’ondo wasela, manyaki nao eya naji pamo. Kabiji abo bayukatu bulongo, na kwesakanya kwa bimye, awa ng’ondo po akazhika. Bakonsha kwikibika pa kalenda unembwapo bintu byubiwa mulwelele kulutwe yetu, ne kukubuula, kufika ne pamineti, kimye manyaki po akonsha kupona. Kine, mambo ajo jo jishinda ng’ondo jo abena kwendelamo, mambo kyabikwa mu mizhilo yakwa Lesa.

<sup>121</sup> Amiwa naimene, juba jikwabo, ku Kizhiba kya Michigan. Kabiji Naile ku Kizhiba kya Superior, palwendo lwami lwa kuya ku Canada, akya kizhiba kikatampe kya meema. Kabiji Naimene byobyaya, kabiji Nalangulukile mba, “Ma mailoshi anga akilang’anya pa kikye kizhiba kya meema kuno?” Kabiji pano panyuma Yakukilang’anya Mich-... nangwa, Kizhiba kya Superior, Nakonsha kwiya mu Michigan, pepi nobe pamotu bukata bwa kizhiba kya meema. Kabiji kuya kokwa, kufuma ku Kizhiba kya Superior kuya ku Kizhiba kya Michigan, kufuma ku Kizhiba kya Michigan kuya ku Kizhiba kya Ontario, kabiji nobe... ne Huron, kabiji ne bizhiba byonse pamo. Mambilyoni anga mambilyoni anga mambilyoni, ne mipaipei ya meema awama a kukakalwa kubala aji mu kizhiba!

122 Kabiji kokwa ku Nevada, ne ku Arizona, New Mexico, California wa Kumusela, kuji mamilyoni ama ekita a uminina, mushinji ubena kupya. Wawama kyakuuba mba, inge meema akonsha kufika pa mushinji, kino kyaalo kyakonsha kujisha ntanda yonse, kwakubula bantu bafwa zala ne, kabiji kwaikala ne kashalapo kakutaya mu kalunga. Abyo ibyo! Mamilyoni ama ekita akonsha kujima ma tani a mamilyoni a matani atamba ne kabiki, ne kunde ne—ne bishu, ne kalota ne selali, ne bibimbi, ne bikwabo byavula. Mushinji wafwainwa kwibikomesha, ubena—ubena kukabilatu meema.

123 Kabiji papo paji meema *papo*, kabiji papo ke mushinji panshi *papo*. Pano twakonsha kwikimona, kabiji twayuka mba wakonsha kwi kyuba, mambo twakonsha kupesapesa meema ne kumona mba awamatu, ne kupesapesa maloba ne kumona mba awama. Pano, kuketekela konse kotwafwainwa kwikala nako, kechi kwakonsha kwibimvwanga pamo ne. Bino, kuji muzhilo, kabiji ne yewa muzhilo ke kinemenezhi kya kubwezha panshi. Pano, inge twakonsha kwingila mwaila muzhilo wa kinemenezhi kya panshi, twakonsha kutekezha yonse ya ntanda, kusenda meema kufuma mu bizhiba na kutekezha. Pakuuba twafwainwa kwingila mwaila muzhilo wa kinemenezhi kya panshi. Kechi twakonsha kwikiketekela momwa ne. Kechi twakonsha kwikibijika ne. Kechi twakonsha kwikyamba ne. Twafwainwa kwingijila mu mizhilo ya kinemenezhi kitwala panshi, pakuuba mba twikifikizhe kokwa. Lesa wabika bintu byonse mu mizhilo.

124 Apo, Nalangulukilenga mba, Amiwa kechi nayuka ne kana Nemubuujiile kikye, nangwa ine. Najinga ku Kentucky, na kwipaya tu baluyeye, na Mulongo Wood, pepi nobe mwaka umo wapita. Kabiji atweba. . . Baluyeye bajinga bashupa bingi, kabiji nanchi twaile ku nzubo ya mulunda, pakuuba mba twipuzhe pa kwipaya nyama. Muntu umo wajinga na maekita abaya bingi ya mushinji, kabiji payuwe mushinji pajinga bichi byavula bingi. Bino Mulongo Wood wambunjiile, mba, “Awe muntu kilubi. Aye—aye ye wabula kwitabila.” Nanchi aye waambile mba wamuyukile, nanchi aye. . . nangwa bashanji bamuyukile, wayanga konka na kutambula sambu ya kuyamo na kwipaya nyama.

125 Twaendele kufika pa kifulo kya mwanamulume. Kabiji aye ne muntu mukwabo, bonse babiji bajinga na myaka iji mu masebete, abo baikete mushi ya kinchi kya maepo. Kabiji Mr. Wood waile ku yuwe muntu, kabiji waambile kwi aye mba, “Bushe Nakonsha kuya na kunsosola pacheche mu mpuzha yenu nyi?” Kabiji aye waambile mba, “Kyawama,” waambile mba, “kijitu bulongo.” Aye waambile mba, “Wing’anyi Wood obe? Obewa wi nsongwalume wakwa Jim Wood?”

Aye waambile mba, “Amiwa yami iye.”

<sup>126</sup> Aye waambile mba, “Kyawama, Jimmy mukulumpe wajinga wakishika, kabiji ne bikwabotu.” Aye waambile mba, “Obewa wakonsha kuya na kunsosola konse komukeba kuya, mu mpuzha yami. Amiwa njina aduleendi ma ekita *avula-bingi* muno, inkwashe obewa mwine. Yanga monkamwa muji kyongo, konse ko ukeba. Ikalaitu bakasuluka nobe penu.”

<sup>127</sup> Naikela mu motoka, mambo Nalangulukile mba musapwishi ne kilubi kechi bakonsha kuyila mumone ne, inge twakonsha kwipuzha kutalwa bulongo ku kilubi.

<sup>128</sup> Nanchi pa kupitapo ka kimye, Mulongo Wood waambile mba, “Kyawama, pano, Nafwainwa kwikala na kafunga wami pamo nyi? Naketekela mba kyakonsha kwikalatu bulongo aye kwiya.”

<sup>129</sup> Kabiji awe mwanamulume mukote waalulukile na mukombo waji, ne kwamba mba, “Wood, ubena wambula mba wipezha bingi kubwela panshi, kyakuuba mba wafwainwa kwikala na musapwishi konse ko uya?”

<sup>130</sup> Kabiji nanchi, Nalangulukile mba, pa nyuma ya kikye, Kyawama kufuma mu motoka. Nanchi Amiwa nafumamo mu motoka, ne kwamba ku mwanamulume mukote mu mamineti acheche. Kabiji wanyukishe bukiji bukiji amba kechi ujipo na mwingilo wabaya na basapwishi ne, mambo aye walangulukile mba babena kwamba pa kintu kimo kyo babula kuyuka ne.

<sup>131</sup> Aye waambile mba, “Abo batamaukatu na kintu kimo kyo babula kuyuka ne. Kyawama,” aye waambile mba, “inge muntu waamba kwi amiwa, Amiwa na mukeba wayuka kyo abena kwambapo.” Pano, akyo ke kintu kyawama. Akyo ke kintu kyawama. Aye waambile mba, “Pano, inge muntu waamba kwi amiwa, Amiwa kechi nkeba aye kwamba pa *kintu-kikwabo ne*, kumwekanyika mba kafwako kyo ayukapo ne. Amiwa na mukeba kwamba pa kintu kimo kyo ayuka kwambapo.” Kyawama, Nanemekele kyokyo. Napaine mushingi ku kyokyo muyewa mwanamulume mukote.

<sup>132</sup> Kabiji nanchi Naambile mba, “Kyawama, nangwa byonkabyo, awo ke muntu yense mwaila milanguluko yanji.”

<sup>133</sup> Kabiji aye waambile mba, “Kwajingapo musapwishi umo waishile mu kino kyaalo, myaka icheche yapitapo, ao wajinga napwijilo kokwa ku Acton.” Kabiji waambile mba, “Awe musapwishi, bufuku bumu, byo ajinga mwenyi mu kyaalo, waambile ku—ku inetu awo waikela mu jibumba mba, ‘Unji na katambala ku pokochi obe. Kabiji obewa wi Mrs. *Kananga-ne-kananga*. Kabiji uji na nyenga wakolwa pa katumba kokwa. Jizhina janji ke *Kananga-ne-kananga*. Ubena kufwa, na kaasa uji munda.’ Kabiji waambile mba, ‘Tola kako katambala kabiji ukekabike pa nyenga yobe, kabiji ne kumubula mba, “ABYO BYOBYAAMBA AYE NKAMBO, aye kechi ubena kufwa ne, bino ukekala na bumi.”’”



134 Aye waambile mba, “Awe mwanamukazhi umo wajinga mulunda netu.” Kabiji waambile mba, “Twasendele yuwe mwanamukazhi na katambala kokwa, nangwa, awe mwanamulume, uu, awa muntu...” Patanshi aye waambile mba, “Awe mwanamukazhi, mukazhi wami ne Amiwa twajinga kokwa alwa lukeelo kabiji nasendele, napembejile yuwe mwanamukazhi. Kabiji wajinga wakatazhiwa bingi! Badokotala bamukakelwetu, kala kunyuma. Wakatazhiwe bingi kyakuuba mba twamwendeshengatu mu mushishibechi, twamushikula ne ku mubika pa mwanya, twabwela twamubwezha. Twamwalula mu mushishibechi, wajinga wakatazhiwa bingi.” Aye waambile mba, “Bufuku bumo, akwa, kwaumvwanikile kyongo nobe muntu umo wafwile.”

135 Awa wajinga Ben kokwa, na koka katambala, na kwikatwala konkakwa. Naketekela kyajinga obewa, kechi ibyo nyi, Ben? [Mulongo Ben Bryant waamba mba, “Amena. Amena.”—Waku.] Wajinga Mulongo Ben kokwa, watolelenga katambala, mambo watwajile mwanamukazhi konkakwa.

136 Kabiji waambile mba, “Lukeelo lwalondejilepo, wajilenga mapai muji maepo akusalula.” Kabiji waambile mba, “Aye pano kechi ubatu mingilo yanji bunkene, bino uba ne mingilo yabena kikalakulo. Wajinga wakosa bulongo!” Aye waambile mba, “Pano Ngikala wakumya kimye kyonse. Kana Nakimonapo awa musapwishi, aye wayukile kyo aambilengapo,” waambile mba, “Na—Nakonsha kutemwa kwisamba nanji.”

137 Mulongo Wood wantajile kwi amiwa, kabiji ne amiwa Nantajile kwi aye. Kasa naimana popa, ndochi, kabiji wasulwila ne biko, twajinga mungye, na—na mashi aba luyeye ponse ponse. Kabiji nanchi Naambile mba, “Kyawama,” Naambile mba, “bushe... Ubena kumbula mba wakonsha kwisamba na yuwe mulongo pakuuba mba wakubuula byo aubile kyokya nyi?”

Aye waambile mba, “Ee, mwane, amo mo Nekitazha.”

Naambile mba, “Kyawama, akyo—akyo ke kintu kyawama.”

138 Amiwa najilenga jimo ja ma epozi anji. Majaketi acheche akala a kibobo obamvwajile kokwa, mwayukatu, mu kimye kyalutepu kya mumwaka, mu Kasalakanduba. Nanchi Najinga na jiepo jicheche, kabiji Najileko. Kabiji Naambile mba, “Aje ke jiepo jawama bingi.” Naambile mba, “Akyo kichi kyaikalapo myaka inga?”

139 “Oo,” aye waambile mba, “Najimbile kyokya kichi popa, sate nangwa myaka foote yapitapo, nangwa kintu kikwabo.”

140 “Ee, mwane.” Naambile mba, “Nasaka kukwipuzha jipuzho.” Naambile mba, “Mujishinda ka panopantanda... Namona aa ma apozi byo apona ku kyokya kichi, kabiji mabula akyo abena kuponako, bino pano ke pakachi ka Kasalakanduba.” Kabiji naambile mba, “Kechi twakikalapo na kimye kya mashika ne, kechi twakikalapo nangwa na mabebe

nangwa kiji kyonse ne, kabiji nangwa byonkabyo mabula abena kuponako ku kyokya kichi. Kika kyo kyaikela byo bya?"

Aye waambile mba, "Meema afumamo mu kichi."

"Oo," Naambile mba, "kwepi ko aya?"

Aye waambile mba, "Kushi ku mizhazhi."

Kabiji Naambile mba, "Nanchi akekalako kimye kyabaya byepi kokwa?"

Aye waambile mba, "Poso kimye kya lutempu."

141 Kabiji Naambile mba, "Kabiji kikabwela jibiji, na kwimuletela mabula apya a kifutele, ne ma epozi apya a kuja."

Aye waambile mba, "Abyo ibyo. Kine ibyo."

142 Naambile mba, "Kyawama, Nakeba kwimwipuzhako kintu kimo, mwane. Anweba mwaamba pa babo balongo babula kuyuka kyo babena kwambapo." Naambile mba, "Bushe mwakonsha kulondolola ng'anyi Bujimuku bwakonsha kulengela aa meema kufuma ku kyokya kichi? Inge ayikala momwa mu kimye kya mashika, kichi kyafwainwa kufwa. Mwakonsha kwipaya kichi. Kakishi ka bumi kaji mu oa meema." Nanchi Naambile mba, "Kyakonsha kwipaya kichi. Ng'anyi Bujimuku bwakonsha kulengela aa meema kuya panshi ya kyokya kichi, kuya ku mizhazhi, kabiji ne kwikala poso kimye kya lutempu, kabiji abwela jibiji na kuleta ma apozi akwabo?" Naambile mba, "Bikai meema mu kibaketi ne kwikibika peulu, kabiji mumone kana, mu Kasalakanduba, akaya panshi ya jishiki ne kubwela jibiji mu kimye kya lutempu. Mwamona?" Naambile mba, "Kuji muzhilo umo, kuji muzhilo wa bilengwa na lesa. Bujimuku Bumo bwabika yuwe muzhilo mundonda. Kechi kyonkakyotu ne, bino abwa bonka bumo Bujimuku bwingijisha awa muzhilo, abo bwi atwala panshi ku mizhazhi ya kichi, ne kubwela jibiji."

Aye waambile mba, "Amiwa kechi nalangulukilepo pa kyokyo ne."

143 Naambile mba, "Mwakonsha kuuba... Inge mwakonsha kutana abwa Bujimuku bwakonsha kulengela aa meema kwikila panshi ya kichi kufuma ku misapi ya kichi, kwikila panshi ya mizhazhi ne kubwela jibiji, abwa bo Bujimuku bumo bwambujile abwa bufuku kokwa, 'Yanga, ukabike aka katambala pa mwanamukazhi."

Aye waambile mba, "Nanchi yobe yewa musapwishi?"

Naambile mba, "Ee, mwane, abyo ibyo."

144 Mwaka wapwa Najinga wapwisha (aye waya), kabiji kimye kyaikajile kituzhi wanji mwakukokolokela, na kwangula ma epozi, afuma ku kichi kimo. Mulongo. . . Patanshitu basakilenga kwitupangamo atweba, abo kechi betuyukile kana yetu ng'anyi ne. Kabiji naileko na kumubuula pakikyee, amba twapewa

nsambu kufuma kwi aye. Kabiji namubujile pa kikye, “Aye wisolwele kwi Kilishitu kasa akyangye kufwa ne.”

<sup>145</sup> Mwamona, kika kyuba kyokya kichi, ng’anyi Bujimuku butwala kyokya panshi? Ke muzhilo. Ke muzhilo Lesa ye abika mu ndonda. Kabiji awa muzhilo ke muzhilo wakwa Lesa ao wakonsha kulamawizha kikye. Amena.

<sup>146</sup> Mwayukatu, Amiwa kechi natako muchima nangwa ujile byepi, ne kwamba—kwamba pano, “Kechi kikaya ne, juba kechi jikasama jibiji pa kino kimye ne.” Kikasame, nangwa byonkabyo. Wakonsha kwamba byepi mba, “Ami—Ami—Ami kechi nsakuswisha kimye kya bufuku kwiya ne.” Bukeya, nangwa byonkabyo. Mambo akuuba mba akye kintu kyo twikalamo, kyatelwa mba ntanda, kitangijilwa na muzhilo wa kwa Lesa.

<sup>147</sup> Pano, balongo ne banyenga, Nasaka kwi mwipuzhapo kintu kimo. Nanchi, inge twasemwa jibiji ku Mupashi wakwa Lesa. . . Lesa kechi uji na bibese bimo bicheche byanekena kabiji ne bibese bikatampe byakosa ne, Aye ujitu pamo Lesa! Kabiji umvwe uji na Lesa wavula mwi obewa, poso waikalatu kivule, abo ke bulume bwafikilamo bwa kulenga ntanda ipya. Abwa ke bulume bwabaya bingi bwakulenga ng’ondo mupya kabiji ne ntachikilo ipya. Ke Lesa, kabiji kyakosa! Kabiji ponkapano yense waitabila muno uji na Bumi Bwapeenape, ao ye, Mupashi wakwa Lesa mwi obewa; Bulume bwafikilamo bwakonsha kusangula bafwa, bwakonsha kubuka bakolwa, bwakonsha kubika bintu byonse mulwelele mu mundonda yabyo. Bino obewa, bitangijilwa na muzhilo, awa Mupashi uji mwi obewa. Anweba mwi baana babalume ne babakazhi bakwa Lesa. Awa yeka Mupashi umo ye uji nanji mwi obewa, ukakusangula obewa mwine pa juba ja lusanguko.

<sup>148</sup> Yesu, kimye kyo Ajinga pano pantanda, byo Afwile, mweo Wanji wakukulukile kuya mu kalunga kabafu, “Kabiji wasapwijile ku mipashi yajinga mu kaleya, myeo iji mu kaleya, yabujile kulapila mu kukoka muchima kwa moba akwa Nowa.” Mubiji wanji waile mu kilende. Bino Aye kasa akyangye kufwa, Aye wabikile Mupashi Wanji mu maboko akwa Lesa. Mupashi Wanji waile kwi Lesa, mweo Wanji waile mu kalunga ka bafu, kabiji ne mubiji Wanji waile mu kilende. Kabiji Yesu waswinshiwe kusanguka ne poso Kinembelo kifikizhiwe. Aye kechi wakonsheshe kubwela ne, mambo Aye wafwaijlwe kwikala mu kilende pa moba asatu ne mafuku. Pakuuba Kinembelo byo kyafikizhiwe, akye kyamba kyafumishiwepo; Mupashi Wanji wakukulukile kwiya ku mweo Wanji, mweo Wanji ku mubiji Wanji, kabiji Wasangukile jibiji.

<sup>149</sup> Kabiji umvwe twafwa, myeo yetu ikaya mushi ya kitapisho kya Lesa; ako ko Najinga na jishuko ja kumona, lukeelo lumo lwapitapo, nobe byo mwayukatu, mu kimwesho, amo Baibolo

po aamba mba, “Mipashi yetu ikaya kwi Lesa Ao wi ipaine, ne mibiji yetu ikabwela ku lukungu lwa panshi.” Bino juba jimo, inge Kinembelo kyafikizhiwa, mipashi yetu ikakasululwa kufuma kwi Lesa, ikasenda mweo, kabiji ne mweo ku mubiji. Kabiji ne bobwa Bulume bwa kwitusangula, buji kala mwi atweba ponkapano! Atweba pano tuji mu bifulo bya Mwiulu. Atweba pano tuji mu Bulume bwa lusanguko.

<sup>150</sup> Inge kechi kwajingapo mizhilo pa kyokyo ne, baana babalume ne babakazhi ba kwa Lesa bakonsha kwilengela ntanda ya kuyako na kwikala na bumi bwabuke pe ayo. Uji na Bulume mwi obewa bwa kwikyuba. Inge uji na kivule kya Bulume bwa Lesa mwi obewa, uji na Bulume bwa kwikyuba. Lesa ye wabulume bonse. Mwamona mo Nekitazha nyi? Abwa Bulume buji mwi anweba bukalenga, wakonsha kulenga ntanda yaikalako kabiji waya wakekalapo. Aleluya! Abyo byokiji.

<sup>151</sup> Abo bo Bulume buji mu Kipwilo pakino kimye, bino butangijilwa na muzhilo. Kabiji awa muzhilo kechi “kulama yavula mikambizho ne.” Ke muzhilo wa lwitabilo. Yesu waambile mba, “Bintu byonse byakonsheka kubooba baitabila.” Kabiji inge mwakonsha kwikiketekela, kyonse Lesa kyo akatangijila mweo obe kuketekela, akya ke kyobe. Kifulo kyonse kulu kobe po kwakonsha kunyata, konka ku lwitabilo, Lesa wikipana kwi obewa. Amena! Ke kyobe, wikyangata, inge wakonsha kutana kii wa kuyuwe muzhilo wa lwitabilo akya kishikuka kwi obewa. Mwamona mo Nekitazha nyi? Abwa Bulume butangijilwa na . . . Inge obewa wi mwaana wakwa Lesa, obewa wi mwaana wamukazhi wakwa Lesa, akyo kechi kikusha obewa ne. Kiji pamo ne obewa kimye kyonse. Bino, lwitabilo lobe lo lufumako ku Kikye, bino akyo Kikijitu ponka. Aleluya!

<sup>152</sup> Umvwe wapuluka, Lesa ukupa lwitabilo lwa kwimana kufuma mu mateshi antanda. Lwitabilo lobe lushinda bintu bya pano pantanda. Nga lwitabilo lobe lo luka? Lwitabilo lobe mu kyokya kyubilo Lesa kyo auba mwi obewa, kukulenga obewa waikala mwaana wakwa Lesa. Obewa uleka kubepa bubela, obewa uleka kwiba, obewa uleka kutoma, mambo lwitabilo lobe lukusutula peulu ya kikye. Amena. Inge wabula kwikyuba, kechi uji na lwitabilo luji lonse ne. “Kabiji ko kulwitabilo kowapulukila, kabiji neakyo ke kya bupetu.”

<sup>153</sup> Monka mwavujila lwitabilo lufuma mwi obewa, mo mwavujila ne Bulume bo wakonsha kwikala nabo, mambo mwi anweba mwaikala Bulume bwa kulengela Meulu ne ntanda. Lesa wikala mwi obewa, kabiji anweba mwi baana babalume ne babakazhi bakwa Lesa. Amena! Byobyoby kiji. Bino, ke lwitabilo lobe. Yesu waambile mba, “Monka mwayikela lwitabilo lobe, kikubilwe byonkabyo. Inge wakonsha kuketekela, bintu byonse byakonsheka kubiwa. Kine, Nemwambila namba, inge mwaambila yuwe muntumba amba ‘Enda,’ kabiji kechi uzhinauke ne, bino ketekela akya kyo waamba!”

154 Pano nanchi musango ka wa bantu ye twafwainwa kwikelamo, kwikala na lwitabilo mu bubwe bukuzhi bukatampe bwa Kilishitu waikala mwi obewa, aje Jibwe jo bapumako jibula kusha Kipwilo? “Amiwa njinenu kimye kyonse, kufikatu ne kumpelo ya ntanda,” akya Kyeenyi-kikatampe kitanwapo kimye kyonse kya nsulo ya lupulukilo kabiji ne Bulume bwaitulukile kufuma ku Kalvali kuya mu Kipwilo, akya Kyeenyi-kitanwapo kya kwa Lesa mumi, lupito lukatampe, Jibwe jo bapuma njenda ne atweba mu lwendo lwetu.

155 Isalela wataile lwitabilo lwanji. Bafuminemo mu jishinda. Batatwile kwikala na lwisio lwa mipika ya butunshi. Inge baikele na lwitabilo, kabiji ne kuketekela mba Lesa ukebatwala mu ntanda, kechi kwafwajilwe kwikala kintu kya kwibakanya ne. Bajinga banshikula kala tulunga, bapumine myalo pa balwanyani babo, baipaile balwanyani kunyuma yabo, kabiji baendele kuya muyoya ntanda, kabiji nangwa byonkabyo kechi bajinga na lwitabilo lwa kuya ku mulaye ne.

156 Yoshiwa ne Kaleba bajinga na lwitabilo! Baambile mba, “Atweba twakonsha kushinda kiji kyonse kyafwainwa kwiya kulutwe yetu.”

157 Alo lolukatazho luji na kipwilo. Twakonsha kushinda misongo yonse. Tuji na Bulume mwi atweba. Atweba twi baana babalume ne babakazhi bakwa Lesa, kafwako nangwa kimo kyakonsha kwimana kulutwe yetu ne. Kintutu kimo, Aye ukeba muntu umo wakonsha kwikiswa, ng’anyi ukaketekela byamubila kala Lesa. Kechi *byo* tukekala ne; *byo* tuji pakino kimye! Kabiji Kyeenyi-kya bumi kitanwako kimye kyonse kya Mupashi kiji ne atweba. Amena! Byobyoyo kiji.

158 Amo mo Nanjikutazha byo Nanjkwamba pa mutwe lukeelo luno, *Aa Meema-Atanwako Kimye Kyonse Kufuma Ku Jibwe*. Aa Meema atanwako kimye kyonse kufuma ku Jibwe aji ponkapano, aa Meema atanwako-kimye kyonse kufuma ku Jibwe jobapumako pa Kalvali. Kimye Mupashi Wazhila kyo afumine mwi Aye pa Kalvali, awa wabwelele pa Kipwilo pa Juba ja Pentekositi, awa yeka Mupashi Wazhila umo uji muno lukeelo luno. Kabiji Ye witupa mulaye atweba!

159 Ao oene mambo, pa kwenda kumeso a bantu bakolwa, kimye kyo Atumine kokwa, Amiwa nekiketekela; Lesa ye wikyambile! Amo bimwesho mo bimwekela; Lesa wikilaile! Lesa kechi wakonsha kubepa bubela ne.

160 Kiketekelai! Mwafwainwa kwikiketekela. Pafwainwa kwikala Kintu kimo popa, shinkulako yewa tampa, shinkula kyokya kintu pakuuba mba utwele. Kyo tubena kukeba leelo kechi kya kulombelela Bulume bwavula ne. Anweba muji na Bulume bwavula bwa kulengela ntanda ipya. Kibena kukebewa ke lwitabilo lwa kwingijisha bobwa Bulume. Kikebewa ke kulamawizha bobwa bumi, ne kwikala bumi bwa bulesa,

kyakuuba mba umvwe waipuzha Lesa kintu kiji kyonse, mwayukatu! Tuji na luketekelo mwi Lesa, lwa kyokyo. Twayuka, inge twalama Mikambizho Yanji, Aye kechi ukafyapo kintu nangwa kimo kwi atweba ne, inge twakonsha kwenda Nanji. Lesa kwenda ne atweba. Oo, ami!

<sup>161</sup> Abo bajinga na kintu kimo kya kuuba. Bajinga na kintu kimo kya kuuba, akyo ke, kwikalatu ne kuya kulutwe. Kechi kupitang'ana kuya *kukwe ne*, kabiji kupitang'ana kuya *kokwa ne*; pakuuba ikalatu mujishinda jaoloka! Akyo Kipwilo kijitu na kintu kimo kya kuuba, kwikalatu mu jishinda jaoloka! Bajinga na Mumbulungwa wa Mujilo, ao ye bajinga nanji, pakuuba mba belame abo bene ponka pakulondela yewa Mumbulungwa wa Mujilo. Akyo kyo kibatangijilenga. Kintu kyabo kyo bakonsha kumona, ke yewa Mumbulungwa wa Mujilo. Abo ba Mumwene kwingila mwi Mosesa, kabiji bayukile mba ye wajinga tangi.

<sup>162</sup> Leelo tuji na Kyambo. Atweba tulondela Kyambo. Kabiji twamona Kyambo byo kibena kwingila mu baitabila, kabiji twayuka mba byokiji, nanchi. Lesa ubena kwingila ne atweba, kushiniikisha Kyambo na biyukilo kasa bibena kulondela! Twaikala na Kyambo. Akyo Kyambo kilupula biju mukachi.

<sup>163</sup> Baikele ne Mosesa. Mambo, Mumbulungwa wa Mujilo, Mosesa wamulondejilenga Kyokya. Kabiji balondejilenga. Byo batatwile kwalukilamo Mosesa, ne kwendeleka Lesa kabiji ne Mosesa, batatwile kuya na kupitang'ana kukwe kulubaji lumo kabiji ne lukwabo. Makatazho atwelele. Kine.

<sup>164</sup> Twikalala na Kyambo, kabiji Kyambo kileta biyukilo. Yesu waambile mba, "Abye biyukilo bikebalondelanga baitabila Kyambo." Monai, kikalatu na... Obewa kwikalatu na Kyambo, Kyambo kileta biyukilo. Bino, Mosesa, waubile byepi?

<sup>165</sup> Abo bapitang'enengatu, kabiji baubile byepi? Bafumine mu jishinda, kabiji bataile kwafuminenga meema abo.

<sup>166</sup> Naketekela mba abyo kipwilo byo kyauba leelo. Kyaya mungi mu jishinda ja Kinembelo. Baaya mungi mu ma izimu. Baile mu tubintu tuheche to bafwainwa kubula kuuba ne. Baalwile bintu bingi. Abo balengelemo bintu nobe Mafunjisho a Batumwa. Kwepi ko mutana byo byo mu Baibolo? Balengele bukachuchumani bo batanga. Abo balengelemo madinominesheni mu kifulo kya kupitamo mu bibye. Balengelemo kwiimuna mu maboko mukifulo kya kupita mu kusemwa-jibiji. Balengelemo kwisasa meema mukifulo kya lubatizhilo lwa mu meema. Abo balengelemo musango watama, "Taata, Mwaana, ne Mupashi Wazhila," bino kasa kwabula kintu kya musango yeo mu Baibolo. Aye Baibolo waamba mba, "Mu Jizhina ja Yesu Kilishitu!" Kujitu kintu kimo kya kuuba inge ubena kukeba aa Meema, bwelai mu jishinda ne jikwabo. Bwelai mu... Aye kechi wakitusha ne; Aye ukiji ponka. Watolamo

mafunjisho a bantu mukifulo kya Kilishitu. Wafumamo mu jishinda.

167 Umo waambile mba, “Kyawama, Amiwa ne Methodist.”

Ne bakwabo baamba mba, “Amiwa ne Baptist.”

Akyo kimwesa amba obewa kechi wi Mwinakilishitu ne, nanchi. Atweba twi ba Kilishitu! Atweba twiiba Kwanji.

Mwaamba mba, “Kyawama, inge, ami, waki Baptist?”

Inge abyo byobyoka byo muji, nishi anweba kechi mwi wa kwa Kilishitu ne, obewa wi Baptist.

Mwaamba mba, “Kyawama, Amiwa ne Pentekosito.”

Inge obewa wi Pentekosito kupichila mu dinominesheni, byo byonka byo uji.

168 Bino, inge kechi uji na kyakupitamo kya pentekosito ne! Kabiji Kyambo kya pentekosito kikasemununa kyakupitamo kya pentekosito! Londelai kintu kimo aba banababwanga kyo baubilepo, ikalai konkakwa poso mwayuzhiwamo na Mupashi Wazhila.

169 Kabiji umvwe akya kyo uji nakyoye kyapusanako na Kyambo, awa mupashi mwi obewa wapusenamo mu byaamba Kyambo, nishi kechi ye Mupashi Wazhila ne. Ke diabola ubena kupashang’anya Mupashi Wazhila. Mwamona po tuji nakyoye? Oo, atweba bamo twaambile na jimi, twabijikilenga ne bintu bya musangon yewa, ne kukana bintu byonse bye. Twaswisha bintu byavula byabujile mu Kinembelo kwiya mu kipwilo. Pepi potwafika leelo? Twabwela ku kiselebwa kikwabo, kabungwe kauminina. Twibungizhe bu kabungwe, ne kutaya Meema etu. Abyo kine byo byaabile Pentekositi. Byo kyatatwile mu bu kabungwe, kyatatwile kwabanya lumvwang’ano lwa bupopweshi, ne kwamba mba, “Kyawama, bino atweba kechi twingijila pamo ne, inge awe muntu waketekela *kyokyo*.”

170 Yanga kulutwe, ikala nanji poso waiya ku Kyambo kya Bukine, maana a Bukine. Musango yense ye kijimo, kilekai kiyenga, nangwa byonkabyo. Yaingatu kulutwe, ikalaitu balongo na balongo.

171 Bino, oo, twafwaijilwe kwikala bukabungwe, ne kwamba mba, “Kyawama, mambo obewa kechi wi wa Buumo ne, mambo obewa kechi wi wa Bubiji ne, nangwa Bu busatu, nangwa nobe *bibye*, kechi tutekela na lumvwang’ano lwabupopweshi ne.” Pano umvwe twauba kyokyo, kika kyo tuba? Twileta atweba bene jibiji mu kiselebwa. Abyo ibyo!

172 Bino, vulukai, kimye Isalela kyo bafumine mujishinda, lwendo lwa kuya ku ntanda ya mulaye, Jibwe kechi jibashile ne; Jaikela ponkapa, nanchi ne meema byo aubile. Nanchi ne Mupashi Wazhila, waikala ponkapa. Atweba kechi twafwainwa kubwela ku nyuma ne.

173 Nanchi, papo Lesa witufunjisha kintu kikatampe. Lesa witufunjisha papo lufunjisho. Kilishitu wapuminwe jimo, ne kupana byakupitamo bya ki pentekosito, kimye kimo, pa bonse. Pano, aja Jibwe byo japuminwe, Kechi jafwaijilwe kupumwa jibiji ne. Japuminwetu jimo.

174 Mosesa walengele kilubo pa Kupumako ja bubiji, kumwesa kunekena kwa lwitabilo lwanji mu Mfuto ya mambo. Pakuuba Kilishitu byo apuminwe jimo, twayuka mba Aye kechi ukapumwa jikwabo ne. Kyawama, Mosesa waubilenga byepi? Mosesa wabikilenga kintu kipya, na kweseka kulenga kintu kipya.

175 Kabiji abyo basapwishi betu byo bauba leelo. Baeseka kulenga kintu kipya. "Atweba twilenga atweba bene ba Assemblies of God. Atweba twilenga atweba bene Kipwilo kya Pentekosito kya Lesa. Tukelenga atweba bene Kinje Kikatampe. Tukelenga atweba bene *kikye, kyokya*, nangwa *kikwabo*." Abyo Lesa kechi byo aubile ne. Awa kechi wajinga mulanguluko Wanji ne.

176 Kilishitu wapuminwe jimo. Akyo kyo kitanshi kya kupitamo. Aja jo jishinda jitanshi. Pa Juba ja Pentekositi, Petelo waambile mba, "Lapilai, anweba bonse, ne kubatizhiwa mu Jizhina ja Yesu Kilishitu."

177 "Atweba tusansa mu jizhina ja 'Taata, Mwaana, Mupashi Wazhila,' kupana misango yonse ya mafunjisho abantu kabiji ne bintu byonse pa Kikye." Inge twafumamo mu Kyambo, kechi kyakukumya ne kafwako kotwakonsha kuya kuji konse ne. Mwamona?

178 Lesa witufunjisha lufunjisho. Mosesa kechi wafwaijilwe kwamba mba, "Pano tusakutatula kintu kingi papo, kabiji tusa kwilenga bu kabungwe kabiji tukalengela kipwilo kya Katolika." Akyo kyo kintu kitanshi kyo baubile. Ine, pano pa kupitapo ka kimye, "Kyawama, tukatatula kintu kipya kya mukyokyo, tukalengamo bena Luther." Pano kwaishile ba Anglican, kabiji pano Baptist, kabiji ne bikwabotu, kabiji ne Bampbellite, kabiji Kipwilo kya Kilishitu, ne antikilishitu, kabiji ne bintu bikwabo byonse. Monai, bonse batatwile kuya, umo palondela mukwabo, umo palondela mukwabo, kulengamo madinominesheni ne tubungwe. Akyo kechi kyajinga ikyo ne. Monai kyokya kyo babena kuuba? Abo babena kupuma Jibwe ne jikwabo, ne kutatula kintu kipya. Atweba kechi tubena kukeba lufunjisho lupyana ne.

179 Muntu yense mu Baibolo wabatizhiwe mu Jizhina ja Yesu Kilishitu. Muntu yense mu Baibolo uji na Mupashi Wazhila, waishile mu jishinda jakwa Lesa, monkatu Lesa mo ekyubijile. Baubiletu kintutu kimo. Bajinga na kyakupitamo kimo. Biyukilo bimo bibalondejilenga. Mingilotu imo ibalondejilenga. Kika? Abo baikejile ku Jibwe. Abo batambwile Meema amo.



180 Kabiji, leelo, ene mambo o twaikela na mafunjisho avula bingi a kipwilo ne madinominesheni, ke mambo akuuba mba tubena kutapa kintu kipya. Atweba kechi tukebapo kintu kipya ne. Bwelaitu panyuma!

181 Mosesa kechi wafwaijilwe kupuma ku Jibwe jibiji ne, kutatula kintu kipya. Aye wafwaijilwe kwamba kwi abo, pa Jibwe jitanshi. Oo, Naketekela mba mwikitambula kyo! Mosesa wafwaijilwe kwamba pa jitanshi, Jibwe japumiwako; kechi kweseka Kwijipuma jibiji ne, kechi kutatula kintu kipya ne, kana kwamba ku Kintu kyakala!

182 Lesa, nkwashai ami! Inge Nafwa kamulanda, mu pulupiti, Nkambangatu bya Jibwe jitanshi! Amiwa nkambangatu pa kyakupitamo kitanshi. Amiwa nkambanga pa Binembelo bitanshi bibapele lubatizhilo lwa Mupashi Wazhila, “Lapilai, anweba bonse, ne kubatizhiwa mu Jizhina ja Yesu Kilishitu mululekelo lwa mambo, kabiji mukatambula wabupetu Mupashi Wazhila.” Akye Kyeenyi-kitanwako kimye kyonse kiji na Meema apita kufuma ku Jibwe akijitu ne atweba. Kikaleta bintutu bimo. Kikaleta bimwesho. Kikaleta bya lubuko. Kikaleta bya bungauzhi. Kikaleta bintu byonse byo baubilepo.

183 Kimye Isalela kyo abwelele mu Binembelo jibiji, kabiji babwelele mu mukwakwa, baile mu ntanda ya mulaye. Bino kibasendejile myaka foote.

184 Pentekositi waikala pepi nobe myaka foote nangwa fifite, na kupitang’ana mungyetu. Bwelai ku Jibwe! Jibena kumweka na meso. Kiji bino, kyanembwa papo pa Kyambo. Aye Mupashi Wazhila uji muno kasa abena kuuba bintu bimo byonka byo Aubilenga kimye kyonse, nanchi Kyeenyi-kitanwako Meema kimye kyonse kiji pano. Anweba bwelaitu Kwiajo, bwelai ku kitanshi, akye kitanshi. Pano kyajinga byepi mu kitanshi kyajingako?

185 “Kyawama, beimwine maboko na musapwishi”? Kechi kujipo kintu kya musango yeo ne. “Abo babatizhilwe mu jizhina ja ‘Taata, Mwaana, Mupashi Wazhila’”? Kechi kujipo kintu kya musango yeo ne. Kechi kujipo bantu mu Baibolo ne, kuji konse, nangwa pangye, myaka fili aduleendi pangye ya Baibolo, wabatizhiwe mu jizhina ja “Taata, Mwaana, Mupashi Wazhila.” Akyo ke lufunjisho lwa ba Katolika, kechi lufunjisho lwa mu Baibolo ne. Mwamona?

186 Bajinga na Mupashi Wazhila. Abye biyukilo bibalondejilenga baitabila. Kikobiwa ne jikwabo mu buleelo. Aja Jibwe jitanwa-nabumi kimye kyonse nobe byonka Byokyajinga kala, aja Jibwe jampumiwako!

187 Kechi twambe mba, “Kyawama, pano iyai mukwatakane na kipwilo kyetu kya Pentekosito, twelai mu kipamo kyabu Pentekosito.” “Ine, obewa iya kuno mukwatakane na ba Baptist, nangwa ba Methodist, nangwa ba Presbyterian, nangwa ba

Katolika.” Kyokika kyo? Kyalumbulula ka kupuma ku Jibwe jibiji, ke kweseka kutatula kintu kipya.

<sup>188</sup> Babuulai mba, “Lapilai, ne kubatizhiwa mu Jizhina ja Yesu Kilishitu,” mu lulekelo lwa mambo enu, “kabiji abye biyukilo bikebalondelanga baitabila.” Pano obewa wabwela mu mukwakwa, kubwela ku Meema amotu. Aa Meema amo akonsha kupana kutalazha muchima kumo. Akapana kumanama kumo mu mubiji. Akapana bulume bumotu bwakutokesha. Kikapana bulume bumo bwalubuko. Kikooba kintu kimo kyo Kyaubilepo pa kyokya kimye, inge twakonsha kubwela ku Mupashi umo.

<sup>189</sup> Bumi mu kichi kya magelepu kipanga magelepu. Inge byo kyaubile mwaka wapwa, kikapanga kintu kimo uno mwaka. Awo ye muzhilo wa Lesa. Muzhilo wa Lesa uji wakuuba mba, inge kikye kichi kya magelepu, kilekaitu bunke, kikapanga magelepu. Anweba mwakonsha kwikimvwangakanya na kikwabo kingi, pano bino kilekaitu bunke bwakyo kikabwela jibiji ku magelepu.

<sup>190</sup> Nanchi twamvwangakanya kipwilo na Kipentekositi, na Kibaptisti, na Kimethodisti na Kipresbyteriani, na—na Kiangilikani, kabiji ne musangotu mukwabo wandonda. Kika kyakubula kwikilekela bunke? Bwelai ku Kichi, kikabwela ku Bulume bumo. Amena! Amena! Natemwa kyokyo.

<sup>191</sup> “Kutatula kintu kimo kipya.” Kintutu kimo kyo twauba. Kechi kweseka kumweshwa luusa ne. “Dokotala *Kananga-ne-kananga* ye watatwile kipwilo kya *Kananga-ne-kananga* kya *kananga-ne-kananga-ne-kananga*.” Akyo kechi byo kyajinga ne.

<sup>192</sup> Abyo Mosesa byobyo aambile mba, “Amiwa nkebamweshwa byo Nakonsha kuuba. Amiwa kekileta, nangwa byonkabyo!” Aye Wapumineko, kechi aishile ne. Aye waamba jibiji mba, “Mweshai byo Nakonsha kuuba!” Lesa waingijile nanji na kyokya.

<sup>193</sup> Bushe kechi mwalanguluka mba, inge anweba “mwakwachijilatu ku dinominesheni umo.” Lesa ukengila nenu pa kyokyo. Abyo kine ibyo. Mwafwainwa kubwela kuyewa musango mutanshi. Bwelai kunyuma.

<sup>194</sup> Anweba aambaitu ku bantu. (Kechi kwiibabula ne, “Iyai mutwele mu kipwilo kyetu. Iyai mwambe lufunjisho lwetu lwa buntu.”) “Anweba bwelai ne kulapila, kabiji ne kubatizhiwa mu Jizhina ja Yesu Kilishitu, mu lulekelo lwa mambo enu; kabiji mukatambula wabupetu Mupashi Wazhila, inge muchima obe uji bulongo. Kabiji abye biyukilo bikebalondela baitabila. Jibumba ja baitabila, abye biyukilo bikebalondelanga.” Mambo aka? Aja Jibwe, aja Jibwe ja kupumako ne Meema Anjo a Bumi bubena kwiya palutwe, na kulenga bintu bimo byonka byo Aubilepo kokwa kunyuma. Kechi kikwasha ne. Oo, ee.

<sup>195</sup> Tubena kukeba kwimweshwa, ne kwamba mba, “Atweba twi ba Methodist, ne ba Baptist.”

196 Anweba ambaitu ku Jibwe, Aye Kyeenyi-kitanwako. Kechi mweseke Kwinungako ne. Amiwa “nanungakana” panshi papo. Kechi mweseke Kwinungakanya ne. Kechi mwakonsha kwitunga ku Kikye ne, akyo ke kintu kimo kyakine. Obewa wakonsha kutwela mu Methodist, obewa wakonsha kutwela mu Baptist, obewa wakonsha kutwelamo mu ba Pentekosito, obewa wakonsha kutwela mu ba Anglican, bino kuuba watwela mu Kikye ne. Ine. Obewa wafwainwa kuyuzhiwa na Kikye. Kwinungakanya ku Kikye ne; obewa wafwainwa kuyuzhiwa na Kikye. Byobyoka. Kyayuzhiwa na ka? Wayuzhiwamo na Bulume, wayuzhiwamo na Mupashi, bayuzhiwamo na Bumi, bwayuzhiwamo na lusekelo, mutende, kukoka muchima, lusa, buwame, Ngovu ya Mupashi Wazhila mu bumi bobo, mambo Kyeenyi kya myaka kiji konka. Vulukai.

Nafwainwa kupwisha mambo kimye kibena kupwa.

197 Bino, vulukai, aja Jibwe kechi jibashile ne. Kechi jibashile ne. Kabiji Kilishitu kechi ukemusha ne; Kilishitu waambile mba, “Amiwa nkekala ne anweba kimye kyonse, kufikatu ne kumpelo ya ntanda.” Abyo ibyo nyi? Kabiji aja Jibwe jaikela nabo kufuma ku Holeba kufika ku Nebo. Jaubile. Kufika ne ku Yodano, Jakijingakotu. Anweba Lesa, Nakeba Kwijimona pa Yodano!

198 Mosesa, kimye kyo ajinga pa Yodano, aja Jibwe jajinga nanji mu jishinda jonse. Kabiji waimene popa, na kutala pa—pa jibumba ja bantu babwela munyuma kabiji bafuma kwi Lesa. Muchima wanji wibakabijile bingi. Kabiji watajile kubushiya bwa Yodano. Akwa wajinga pa Yodano. Yodano, bu mupashi, bo Mbena kwambapo. Kabiji waimene popa, lufu lwaishilenga ku maboko anji. Bino aye watajile, walajile kokwa ku lubaji lwanji kabiji kokwa kwalajile Jibwe. Aye waimenetu pa Jibwe, kabiji ba Malaika baishile, bamusendele.

199 “Amiwa kechi nkakusha obewa nangwa kukuleka ne.” Nangwa bintu bikonse byepi, tukote byepi, musango ka walufu ye twafwainwa kufwilamo, vulukai, Jibwe jikekalako popa pa Yodano. Kechi jikemusha nangwa kwimuleka ne. Anweba vulukaitu kyokyo. Akyo Kyeenyi-kitanwako kimye kyonse kya Meema akufuma mu Jibwe akekala ne atweba mu bumi bonse, kufikatu ne ku Yodano.

200 Twayai tukunyike mitwe yetu. [Mulongo wapana byambo byalutundaiko—Waku.]

201 Kimye Mupashi kyo abena kwenda mukachi ketu, Mupashi wakwa Lesa kasa abena kwenda mukachi ketu, kwakonsha kwikala lukeelo luno muno abo babula kuyuka Kilishitu, kabiji obewa—obewa kechi uji kwipi na joja Jibwe ne, kechi muji na lumvwang’ano lwa kwamba Nanjo lukeelo luno ne? Bino mwayukatu mba Jiji pano. Talai pa Jije jibena kwingila konse konse, mumonai Aye ubena kuzhokoloka, mumonai Aye

ubena kwendauka pa bantu. Akyo kyo Kyeenyi-kitanwako kimye kyonse kya Meema. Alo lo lupulukilo. Awa ye Mupashi unyemesha ma kapu abo kufika ku kifulo kyakuuba mba kechi bakonsha kwikala na mutende kikupu ne, kintu kimo kyafwainwa kwiya kulutwe. Kabiji kechi mwayuka Aye ne, mwakonsha kutemwa kwimanya kuboko kwenu ne kwamba mba, “Ndombeleleko, Mulongo Branham. Amiwa pano nakeba kumuyuka Aye. Kabiji Amiwa nakeba kwamba Nanji, kabiji Amiwa nakeba kumuyuka Aye nobe kuyula konse kwa Mupashi Wanji. Nasaka kuyuka mba Uji ku lubaji lwami, kimye kyonse. Naketekela mba Aye byo aji. Bino Nasaka kwikala wakwisamba nanji. Kabiji Amiwa njina kilaka, kabiji Njina nzala yakwa Lesa. Nasaka kumuyuka Aye bulongo?”

<sup>202</sup> Lesa emupeshe, mwane. Kabiji Lesa emupeshe, mwane. Ne obewa, mulongo. Obewa, ee, kunyuma kwine. Apo, inetu, ee. Ee, inetu. Twamona maboko obe, kabiji Lesa wiamona. Lesa akupeshe, mwanamulume wakyanyike. Lesa emupeshe. Ne obewa, inetu. Amena. Lesa emupeshe. Akupeshe, nyenga. Muntu umo mukwabo pano, mu kimye kyazhindama. Lesa emupeshe, kunyuma kwine, mulunda mwanyike.

<sup>203</sup> Langulukaipo pa kikye. Kilangulukaipo, Kyeenyi-kitanwako kimye kyonse kya Meema kufuma ku Jibwe, awa Mupashi umo; kyakuuba mba Wabijikile kokwa pa juba ja kije kya mambo Aji, byo Asendele luzhachisho lwetu. Kabiji kamama ka bukaji bwakwa Lesa kamufikile Aye, kabiji bubi bwenu bwapombele ku kamama, kabiji kamufikijile Aye, ne Mashi Anji ne meema alupukile kufuma Mwaiye. Aye waambile mba, “Taata, mu maboko Enu mo Napana Mupashi Wami.” Kabiji pa Juba ja Pentekositi, Waishile nakwenda ne atweba mu lwendo. Kabiji Kijitu pepi pano.

<sup>204</sup> Bushe obewa kechi wakonsha kwamba mba, “Amiwa naendauka kufuma ku nzubo, Nkambo, Amiwa mbena kwiya ku muzhi”? Kimye kyo tubena kwimba yuwe, inge wakonsha kutemwa kwiya ku kitapisho na kwizhijika, ne obewa, kwa mweo obe, kwi Kilishitu? Amena.

Naendauka kuya kwalepa kufuma kwi Lesa,  
(Kufuma mujishinda.)

Pano Mbena kwiya ku muzhi;  
Jishinda ja (Kubulwa luketekelo, mwamona.)  
kimye kyabaya Naendauka,  
Nkambo, Amiwa mbena kwiya ku muzhi.

Kwiya kumuzhi, kwiya kumuzhi,  
Kafwako kupitang’ana ne;  
Shikulai maboko Enu abutemwe,  
Pano, Nkambo, Amiwa mbena kwiya ku  
muzhi.

205 [Mulongo Branham wanyinyita *Nkambo, Amiwa mbena kwiya Ku Muzhi*—Waku.]

206 Bansongwalume basatu babacheche baiya kulutwe, lubilo lubilo, ne mipolo mu meso abo, bafukama ku lubaji lwa kitapisho. Mambo, balekelwa mambo. Bajikulekelwa kasa bakyangye kufuma pabipona byabo ne, kyonka kimye po baji kufukula mu milanguluko yabo icheche. Baiyatu kulutwe bafukama kuno, pakuuba mba bayukishe bantu mba, kwepi kulubaji kobaji, lukeelo luno.

207 Nalanguluka mba kusakwikala bantu bakulumpe bakonsha kuuba kikye, nobe kufukama, ne kwamba mba, “Nkambo, Na—Naendauka kuya kwalepa kufuma ku jishinda. Najinga na luzhinauko lukatampe bingi, kabiji kimye kimo Nafumamo ne kuya mu bubu. Pano Na—Nasaka kubwela kimye kasa kikyangye kupwa ne. Lesa, Na—Nasaka kwiya. Nafwainwa kutemwa kwiya na kufukama.” Amena.

208 Pabo, bansongwakazhi basatu bakwa Arthur Beam, pepi nobe kimino kimo, baiya kuno, na kufukama.

209 Ubena kwiya kulutwe ke nsongwakazhi mucheche ao watambulwijile mulongo mupya pa nzubo. Juba jikwabo Naiketetu; Mrs. Wood waishile na kumbuula, waambile mba awe nyenga ubena kuya ku kipatela na kusema mwaana. Aye Mupashi Wazhila waambile mba, “Yanga ukamubuule ukekala nsongwalume.” Byo asemekelwe, wajinga nsongwalume mucheche.

210 Kyamweka nobe baana lukeelo luno, balongo babacheche babena kwiya kufuma ku kalasi wa Nyenga Arnold, babena kwizhijika bumi bwabo. Kitapisho kyonse, ku kilujo kyami, kyayula baana babacheche.

211 Kyafwainwa kwikala kyawama inge twakonsha kwimba lwimbo, kitapisho, ku bantu bonse bashala, bakulumpe.

Pano, Nkambo, Amiwa mbena kwiya ku muzhi.

Kwiya ku muzhi . . . ( . . . ? . . . )

Kafwako kupitang’ana ne;  
Shikulai maboko Enu abutemwe,

Pano, Nkambo, Amiwa mbena kwiya ku muzhi.

212 Twayai tukunyiike mitwe yetu pa kakimye kacheche, tulombelele, babo balongo babacheche.

213 Taata Wamwiulu, inge kukeya jakesha, inge Yesu wakonsha kubanda pa myaka ikwabo teni nangwafitiini, abo bakekala bansongwalume ne bansongwalume bakasenda iye Mbila kuya mu bisemi bikwabo. Mu milanguluko yami kechi mujipo luzhinauko ne, Nkambo, bino mu moba abo onse a bumi bakavuluka kwiya kwabo kwa kuno ku kitapisho. kabiji pakino

kimye ke buneme bucheche, Nkambo. Michima yabo icheche yazhatwa lukeelo luno. Kwakubuula kumvwa ne Mbila yonse ne; bafumatu mu kibamba, na kumvwa Nyenga yetu Arnold wajikwambanga; babena kwenda kuzhokoloka kukitapisho kuno, na kupana bumi bwabo kwi Anweba.

<sup>214</sup> Pano, Taata, Amiwa napwishatu kwamba mba mwi atweba mwikala Mupashi Wazhila. Kabiji awe Mupashi Wazhila, lwitabilo na yuwe Mupashi, uba bintu byonse. Kabiji Naketekela mba uno awala, Anweba balekelaiko ku bubi bonse bo bauba. Kabiji Mbena kwimwipuzha Anweba, na lwitabilo lonse luji mu muchima wami, amba Anweba mukalame bumi bwabo bucheche mulwendo. Kechi bakafumemo mu Jishinda ne.

<sup>215</sup> Akye kyakine ke kintu kyenyi. Aye Mupashi wajikwamba lukeelo luno, twakonsha “kumona kintu kyenyi.” Lesa, inge Anweba mwaleka kwingila na bakwabo, tolai baana babacheche. Kiji byepi lukeelo luno, mu lwito lwa kitapisho, kechi pajipo nangwa mukulumpe umo ne, pakuuba jonseje jibumba ja baana babacheche baiya kuno. Nangwa byonkabyo, yajinga Mbila ikatampe yakosa kukwatakanya, ne bakulumpetu, pakuuba baana bakwata Mupashi wa Kikye. Twimusachila Anweba pa mambo a babo, Taata. Nebapana kwi Anweba, nobe kalume Wenu, nobe michinya ya mbung’eno; mambo, kuvuluka akya Kyeenyi-kitanwako kimye kyonse kya Meema a Bumi akonsha kwenda nabo kimye kyo bakekala na bumi. Lekai bekale na lwitabilo mu bibena kumweka, awa Lesa wibandosa kufuma mu kipona ne kwibekazha kuno, lekai bekale na lwitabilo mwi Lesa moba onse a bumi bwabo. Lekai mipashi yabo icheche ikaletwe kwi Anweba mu juba ja lufu lwabo; ikaletwe mu mubiji wabo mu juba ja lusanguko. Abo ke Benu, Taata. Twibapana kwi Anweba mu Jizhina ja Yesu.

<sup>216</sup> Kimye kyo twakunyika mitwe yetu. Nsakwipuzha bonse baana babacheche baji ku kitapisho, abo baketekela mba Yesu ye Mupulushi wabo ne Umo Wakubuula, akwa kunyuma mu jibumba, kwiya kuno na kufukama ku kitapisho. Mwaketekela mba Yesu wimutemwa kabiji ne kwimulekela bubi bwenu nyi? Nakeba mba anweba bonse twimaneko ne kutala kunyuma ku jibumba. Aje, jo jishinda jakubujilamo bantu amba obewa waketekela mba Yesu wakupulusha. Pano imanaiko, abyo ibyo, kabiji ne kutala ku jibumba. Anweba bonse bansongwalume ne bansongwakazhi batemwa Yesu, imanai ne kutala kunyuma ya kipwilo kokwa, anweba bonse.

<sup>217</sup> Pano nga anweba bansongwakazhi babacheche muji kulutwe? Bushe mwaketekela nyi? Bushe mwatemwa Yesu nyi? Abo bansongwakazhi babacheche muno, bushe mwamutemwa Yesu na muchima wenu yense nyi? Byokiji nyi? Wamutemwa Aye nyi? Anweba mwamutemwa Aye, mutemwe? Imanai kuno, lekai bantu bayuke mba anweba mwatemwa Yesu. Lesa emupeshe.

218 Pano twayai tuzhikule mu *jije* jishinda kabiji twimbile babo bantu kasa tukyangye kuya ne, “Yesu watemwa! Akye Nekiyuka, Baibolo wambula byobyoyo.” Mwamona? Twayai tusutule maboko etu byo tubena kumwimba ponkapano. Kijitu bulongo, twayai tumwimbe.

Yesu watemwa!  
Akye Nekiyuka,  
Mambo Baibolo wambula byobyoyo;  
Babacheche kwi Aye lolubaji lwabo,  
Abo bakoka . . .

219 Pano bikai maboko enu . . .? . . . Atweba bonse pamo:

Ee, Yesu watemwa,  
Ee, Yesu watemwa,  
Ee, Yesu watemwa,  
Aye Baibolo wambula byobyoyo.

220 Pano anweba bonse mpitulukai panyuma yami: Naketekela mba Yesu Kilishitu ye Mwaana wakwa Lesa. Leelo, Namuswa Aye kwikala Mupulushi wami. Kufuma ku jino juba, ne kuya kulutwe, Amiwa kamutemwa Aye kabiji ne kumwingijila Aye. Amena.

221 [Mulongo Ben Bryant waamba mba, “Mulongo Branham, Njina baana foolo pa muchima wami pa kino kimye. Mwakonsha kwibalombelela?”—Waku.] Kine nakonsha, Mulongo Ben.

222 Taata Wamwiulu, awe muntu wamona mba baana bakwabo babacheche babena kwiya kwi Kilishitu, kabiji wajila, nobe shanji, na baana banji babacheche. Kabiji Mupashi waleta baabo babacheche ku kitapisho, lekai yenka Mupashi umo a mpulushe baana banji, Nkambo. Kiswishai kye. Twibapana kwi Anweba, Taata, mu Jizhina ja Yesu Kilishitu.

223 Pano anweba balongo banyike bwelai ku kipona kyenu, Nakeba muntu yense uji kuyuwe mulaini kwiimuna maboko na baabo baana babacheche, nangwa kwibapapasha byo babena kubwela. Anweba bonse bwelai ku bipona byenu, *mujiye* jishinda. kabiji lekai yense uji kukwe apapashe balongo babacheche. Kabiji twimutemwa na michima yetu yonse. Anweba mwi bamembala ba Mubiji wakwa Kilishitu, byonka byo tuji Mukachi atweba bonse.

Tubena kuya ku Ziona,  
Wawama, wawama Ziona;  
Atweba tubena kufoola kuya ku Ziona,  
Awa Muzhi wawama wakwa Lesa.

Iyai, atweba twatemwa Nkambo,  
Kabiji lekai lusekelo lwetu luyukanyikwe,  
Imbai lwimbo na kimenge,  
Imbai lwimbo na kimenge,  
Kabiji zhokolokai Jitanda,  
Kabiji zhokolokai . . .

Ako ke kwimba kwawama! Twayai tusutule maboko etu pano.

Tubena kuya ku Ziona,  
Wawama, wawama Ziona;  
Atweba tubena kufoola kuya ku Ziona,  
Awa Muzhi wawama wakwa Lesa.

Twayai twi imunepo mu maboko kimye kyo tubena kwimba.

Tubena kuya ku Ziona,  
Wawama, wawama Ziona;  
Atweba tubena kufoola kuya ku Ziona,  
Awa Muzhi wawama wakwa Lesa.

<sup>224</sup> Pano twayai twimane na mitwe yetu yakunama, mu kimye kyo . . . Mwimbai Mulongo Teddy, byonka . . .

<sup>225</sup> Amiwa njina byakukabila kuno, ne tutambala ne bikwabotu. Bafwainwa kufuma kubushiya bwa tulunga. Billy wajikumbula mba bajinga na tumambuti tucheche kufuma ku England, twalepa *nobe* byobya, mucheche walematu yense. Kabiji twafwainwa kulombelela kyokyo, ne akyo.

<sup>226</sup> Kabiji nanchi . . . [Mulongo Ben Bryant waamba mba, “Mulongo Branham, mwane ndekelaiko mambo pa kunungakanya, pakuuba lombai mba, waimbile mu motoka wetu bufuku bwapita, kulubaji lwa kilujo kulutwe, lombai mba abye bisololwe. Lombai mba Nkambo ekisolole.”—Waku.] Amena, Mulongo Ben, Amiwa kine nsakuuba kyokyo. [Mulongo Branham wanyinyita *Tubena kuya Ku Ziona*.]

<sup>227</sup> Byo tubena kufoola, Nkambo, twayuka mba Jibwe jo bapuma jijitu pamo ne atweba, Kyeenyi-kitanwako kimye kyonse kya Meema afuma ku Jibwe kyendele pamo na Kipwilo. Anweba Lesa Wapeenape, kwi atweba, lukeelo luno, lwitabilo na yuwe Lesa uji ne atweba. Amiwa nayuka mba Anweba musakwikyuba, byonka byo twakonsha kotalwa bulongo kwi Anweba, amba Anweba mwituketetekele Nakyo. Inge Anweba mwakonsha Kwikipana kwi atweba na kuvula, twakonsha Kwikingijisha bubi, Nkambo. Pakuuba inge twatana bupe ne Anweba, lekai kimweke.

<sup>228</sup> Mulongo wetu waamba mba muntu umo wakwimba ku motoka wanji. Anweba Lesa, twayuka mba muntu kechi uji na mali a kuuba bibye bintu ne. Nalomba mba Anweba musakuleta mulongo na kushininwa, nangwa kintu kimo, wakonsha kulapila pa kuuba kikye, iyai, na kwamba mba, “Mulongo, Amiwa nsakubika motoka wenu, Ne kyubile.” Kwashai Mulongo Ben ne batemwe banji.

<sup>229</sup> Mu maboko ami muji tutambala ne byakukabila, baji na lwitabilo mwi Lesa. Mosesa wajinga na lwitabilo mwi Lesa, kabiji wakilang’anye kalunga. Danyela wajinga na lwitabilo mwi Lesa, kabiji walupwile kufuma mu jiyengo ja babokwe.



Shadeleki, Misheki, ne Abednego, bajinga na lwitabilo mwi Aye, kabiji wazhiminye mujilo.

<sup>230</sup> Paulo wajinga na lwitabilo mwi Aye, kabiji juba jimo mpwijilo yajinga yakosa kabiji Paulo kechi wakonsheshe kufika ku muntu yense ne, aye watolele katambala, ne kwamba mba, “Naketekela mba Lesa uji ne amiwa.” Aye wabikile maboko anji pa tutambala ne maepulo, kabiji mipashi ya ubi yafumine mu bantu, kabiji misongo ne bikola byafumine kwi abo. Lesa, Njina lwitabilo mwi Lesa yenka umo. Lekai byatama biyenga. Misongo, bikola, ne byalumanamo, lekai biyenga, Nkambo.

<sup>231</sup> Anweba yenu Lesa umotu waambile kwi amiwa amwa mu Mumbulungwa wa Mujilo, akwa ku mukola. Anweba yenu Iye uji na kipikichala Kyanji kya kobama kuno pamo ne amiwa, pa kibumba. Anweba muji ne atweba, Nkambo. Anweba mutanwako-kimye kyonse, awa Mumbulungwa wa Mujilo umo. Kabiji twasekejile na Meema kufuma ku Jibwe pajuba pajuba, byo tubena kukwatakana mu Mupashi. Nanchi, Obewa uji pano. Atweba tuji na luketekelo mwi Anweba, Nkambo. Tuji na lwitabilo mwi Anweba. Twaketekela mba Anweba musakwitushinga manyi ne kwitukwasha. Kechi ku lukumo lwetu ne, Nkambo; twakonsha kwikala nobe Mosesa pa kyokya kimye, byo aubile kintu kyatama. Tubena kukeba kubapo kintu kimo kya kwimukwasha Anweba, Nkambo. Ayo yo milanguluko ya mu muchima wetu, kukwasha Anweba, inge twakonsha kwikyuba. Anweba mwitumweshe, Taata, kyonse Anweba kyo mwitukebela atweba mba tuube.

<sup>232</sup> Kabiji pano, pa kyubilo kya lwitabilo, Nazhachisha misongo ayo yaimenako misongo, kabiji ne bibye bya kukabila. Isakusha bantu. Nayuka mba Anweba musakwikyuba, Nkambo. Nekiketekela, mu muchima wami, amba Anweba mukeyyuba. Bukai ketu yonse mukachi ketu lukeelo luno.

<sup>233</sup> Mpulushai bonse bakusutula maboko abo, bajikwamba mba basaka kwiya ku Jibwe, ku Meema. Lesa, lekai bekale na kilaka leelo, lekai kwikale bumi bwamukele pe abo, poso kyakonsha kwibalengela kumvwa kilaka kya Kilishitu. Kiswishai kye.

<sup>234</sup> Ikalai ne atweba bufuku buno, Taata. Anweba Lesa, lekai mone, kupichila mu bibye bya kukabila, biji pa michima ya bantu. Inge kechi pajipo kintu kimo pa muchima wabo ne, nanchi, Nkambo, Anweba mpa kintu kimo kya kusapwila ku michima yabo bufuku buno.

<sup>235</sup> Peshai Mulongo Neville, ne bakazhi banji, kisemi kyanji; kipwilo kyetu kicheche, baketekelwa, bakwasho, bamembala betu. Kabiji Mubiji Wenu konse konse, ekale ne atweba, Taata. Twapana kikyeye ku maboko Enu, mwi Yesu Kilishitu mu Jizhina.

... Ziona;

Atweba tubena kufoola kuya ku Ziona,  
Muzhi wawama wakwa Lesa.

Pano twayai twimbetu, kine, kine kwi Aye ponkapano.  
Mwamona?

Iyai, atweba twatemwa Nkambo,  
Kabiji lekai lusekelo lwetu luyukanyikwe,  
Imbai lwimbo na kimenge,  
Imbai lwimbo na kimenge,  
Ne bazhokoloka Jitanda,  
Ne bazhokoloka Jitanda.

Na michima yetu ya kunama.

Tubena kuya ku Ziona,  
Wawama, wawama Ziona;  
Atweba tubena kufoola kuya ku Ziona,  
Wawama Muzhi wa Lesa. 🕊

61-0723M Aa Meema-Atanwako Kimye Kyonse Kufuma Ku Jibwe  
Branham Tabernacle  
Jeffersonville, Indiana U.S.A.

KAONDE

©2024 VGR, ALL RIGHTS RESERVED

VOICE OF GOD RECORDINGS  
P.O. Box 950, JEFFERSONVILLE, INDIANA 47131 U.S.A.  
[www.branham.org](http://www.branham.org)

## Kayukilo ka kuvuzha

Luusa lonse luji kubene. Awe buuku mwakonsha ku mupulita ku kya kupulitako kya pa nzubo pakuuba mba anweba bene mwakonsha kumwingijisha nangwa kupaanwa, kyatuutu, nobe jishinda ja kunsampwilamo Mambo awama a Yesu Kilishitu. Awe buuku kechi wakupotesha ne, kulengamo avula, kutumwa palubesha, kufiwa mu makopyuta, kututululwa mu milaka ikwabo ne, nangwa kwingijisha mukumwenamo mali kwakubula kuswisha kwanembwa kufuma kuba Voice Of God Recordings®.

Pakukeba kuyukilapo bikwabo nangwatu mabuuku akwabo, mwane tumai pa:

VOICE OF GOD RECORDINGS

P.O. Box 950, JEFFERSONVILLE, INDIANA 47131 U.S.A.

[www.branham.org](http://www.branham.org)